


柳田文庫
文庫11
D 292
68



文庫 11
D 292
68

宋史卷一百五十七

列傳第十六

開府儀同三司上柱國錄軍國重事前中書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

吳延祚 子元輔元載元辰

李崇矩 子繼昌

王仁贍 楚昭輔

李處耘 子繼隆繼和

吳延祚字慶之并州太原人少頗讀書事周祖為親校
廣順初授莊宅副使遷內軍器庫使知懷州入為皇城
使會天平符彥卿移鎮大名以廷祚權知鄆州世宗即

萬曆二十七年刊

宋史卷一百五十七

列傳

010190562366

位遷右羽林將軍克內客省使未幾拜宣徽北院使世宗征劉崇爲北面都巡檢使師還權判澶州歸闕加右監門衛大將軍俄遷宣徽南院使判河南府知西京留守事汴河決命延祚督丁壯數萬塞之因增築堤防自京城至臨淮數旬訖工世宗北征權東京留守是夏河漲鄆州原武縣命延祚發近縣丁壯二萬餘塞之師還以延祚爲左驍衛上將軍檢校太傅充樞密使恭帝卽位加檢校太尉宋初加同中書門下二品以其父名璋故避之會李筠叛延祚白太祖曰潞城岳險且阻太行賊據之未易破也筠素勇而輕若速擊之必離上黨衆

邀我戰猶獸亡其藪魚脫於淵因可擒矣太祖遂親征以延祚留守東京兼判開封府筠果領兵來戰澤州南其衆敗走及討李重進又爲東京留守建隆三年夏帝謂之曰卿掌樞務有年于茲與卿秦州以均勞逸明日制出恐卿以離朕左右爲憂故先告卿卽以爲雄武軍節度先是秦州夕陽鎮西北接大藪多材植古伏羌縣之地高防知州日建議就置采造務調軍卒分番取其材以給京師西夏酋長尚波于率衆爭奪頗傷役卒防捕繫其黨以狀聞上令延祚代防賞詔赦尚波于等夏人感悅是年秋以伏羌地來獻乾德二年來朝改鎮京

兆開寶四年長春節來朝俄遇疾車駕臨問命爇艾灸其腹遣中使王繼恩監視之未幾卒年五十四贈侍中官給葬事延祚謹厚寡言性至孝居母喪絕水漿累日好學聚書萬餘卷治家嚴肅尤崇奉釋氏子元輔元載元範元辰元吉元慶元範元慶仕皆至禮賓副使元吉閣門祇候元吉子昭允太子中舍元慶子守仁內殿崇班

元輔字正臣頗好學善筆札周廣順中以父任補供奉官世宗嗣位遷洛苑使宋初授左驍衛將軍澶州巡檢累官至定州鈐轄卒年四十八子昭德昭遜昭普並閣

門祇候

元載建隆初授太子右春坊通事舍人賜緋魚袋延祚出鎮秦雍並補衙門都校延祚卒授供奉官太平興國三年加閣門祇候與太祝母賓古使契丹九年擢為西上閣門副使出知陝州雍熙三年徙知秦州州民李益者為長道縣酒務官家饒於財僮奴數千指恣橫持郡吏短長長吏而下皆畏之民負息錢者數百家郡為督理如公家租調獨推官馮伉不從益遣奴數輩伺伉按行市中拽之下馬因毀辱之先是益厚賂朝中權貴為庇護故累年不敗及伉屢表其事又為邸吏所匿不得

達後因市馬譯者附表以聞譯因入見上其表帝大怒
詔元載逮捕之詔書未至京師權貴已報益益懼亡命
元載以聞帝愈怒詔州郡物色急捕之獲於河中府民
郝氏家鞫于御史府具得其狀斬之盡沒其家益子仕
衡先舉進士任光祿寺丞詔除籍終身不齒益之伏法
民皆飯僧相慶端拱初遷西上閤門使淳化二年加領
富州刺史俄徙知成都府蜀俗奢侈好遊蕩民無贏餘
悉市酒肉爲聲妓樂元載禁止之吏民細罪又不少貸
人多怨咎及王小波亂元載不能捕滅受代歸闕而成
都不守時李仕衡通判華州常銜元載因事殺其父伺
元載至闕遣人開行裝收其關市之稅元載拒之仕衡
抗章疏其罪坐責鄜州團練副使移單州以疾授左衛
將軍致政卒年五十三子昭明爲內殿崇班昭矩太子
中舍

元晟字君華太平興國八年選尚太宗第四女蔡國公
主授左衛將軍駙馬都尉明年正月領愛州刺史是冬
領本州團練使雍熙三年有事北邊元晟表求試劇郡
命知鄆州逾年召入尋知河陽還朝改鄆州觀察使特
詔朝會序班次節度使奉祿賜予悉增之再知河陽淳
化元年以主疾召還主薨復遣之任五年秋霖河溢奔

注溝洫城壘將壞元扆躬涉泥滓督工補塞民多構木
樹杪以避水元扆命濟以舟楫設餅餌以食時澶陝悉
罹水災元扆所部賴以獲安眞宗卽位換安州觀察使
俄知澶州咸平三年轉運使劉錫上其治狀詔書嘉獎
遷寧國軍留後知定州時王超王繼忠領兵踰唐河與
遼人戰元扆度其必敗乃急發州兵護河橋旣而超輩
果敗遼人乘之至橋見陣兵甚盛遂引去考滿吏民詣
闕貢馬疏其善政十事願借留樹碑表其德政詔褒之
屬歲旱吏白召巫以上龍請雨元扆曰巫本妖民龍止
獸也安能格天惟精誠可以動天乃集道人設壇潔齋

三日百拜祈禱澍雨沾洽景德三年代歸拜武勝軍節
度三年以陵域積水議堙掘溝澗命爲修諸陵都部署
以內侍副都知閻承翰副之出知潞州初并代澤潞皆
分轄戍卒後并於太原至是以元扆臨鎮遂分領澤潞
晉絳磁隰威勝七州軍戎事委元扆專總之東封表求
扈從命祀青帝禮畢加檢校太傅知徐州大中祥符四
年以祀汾陰恩改領山南東道五月制書下元扆被疾
卒年五十贈中書令諡忠惠子弟進秩者五人五年葬
元扆時上元欲觀燈帝爲移次夕元扆性謹讓在藩鎮
有憂民心待賓佐以禮喜讀春秋左氏聲色狗馬一不

介意所得祿賜卽給親族孤貧者將赴徐州請對言臣族屬至多其堪祿仕者皆爲表薦餘皆均奉贍之公主有乳媪得入參宮禁元辰慮其去後妄有請託白上拒之真宗深所嘉歎於帝壻中獨稱其賢及歿甚悼惜之且以元辰得疾本州不以聞詔劾其官屬子守禮至六宅使澄州刺史以帝甥特贈和州防禦使守嚴至內殿崇班天禧中錄守嚴子承嗣承緒並爲殿直守良爲內殿崇班守讓閣門祗候

李崇矩字守則潞州上黨人幼孤貧有至行鄉里推服漢祖起晉陽次上黨定弘肇時爲先鋒都校聞崇矩名召署親吏乾祐初弘肇總禁兵兼京城巡檢多殘殺軍民左右懼稍稍引去惟崇矩事之益謹及弘肇被誅獨得免周祖與弘肇素厚善卽位訪求弘肇親舊得崇矩謂之曰我與史公受漢厚恩戮力同心共將王室爲姦邪所構史公卒罹大禍我亦僅免汝史氏家故吏也爲我求其近屬吾將恤之崇矩上其母弟福崇矩素主其家盡籍財產以付福周祖嘉之以崇矩隸世宗帳下顯德初補供奉官從征高平以功轉供備庫副使改作坊使恭帝嗣位命崇矩告哀於南唐還判四方館事宋初李筠叛命崇矩率龍捷驍武左右射禁軍數千人屯河

陽以所部攻大會砦拔之斬首五百級改澤潞南面行營前軍都監與石守信高懷德羅彥環同破筠衆於碾子谷及平澤潞遣崇矩先入城收圖籍視府庫因上言曰上黨臣鄉里也臣父尚豪葬願護櫬歸京師許之賜予甚厚師還會判三司張美出鎮拜右監門衛大將軍克三司使從征李重進還爲宣徽北院使仍判三司乾德二年代趙普拜樞密使五年加檢校太傅時劍南初平禁軍校呂翰聚衆構亂軍多亡命在其黨中言者請誅其妻子太祖疑之以語崇矩崇矩曰叛亡之徒固當孥戮然案籍合誅者萬餘人太祖曰朕恐有被其驅率

非本心者乃令盡釋之翰衆聞之亦稍稍自歸未幾翰敗滅開寶初從征太原會班師命崇矩爲後殿次常山被病帝遣太醫診視命乘涼車還京師崇矩叩頭言涼車乃至尊所御是速臣死爾固辭得免時趙普爲相崇矩以女妻普子承宗相厚善帝聞之不悅有鄭伸者客崇矩門下僅十年性險詖無行崇矩待之漸薄伸銜之因上書告崇矩陰事崇矩不能自明太祖釋不問出爲鎮國軍節度賜伸同進士出身以爲酸棗主簿仍賜器幣襲衣銀帶六年崇矩入爲左衛大將軍太平興國二年夏河防多決詔崇矩乘傳自陝至滄棣按行河堤是

秋出爲邕貴溥賓橫欽六州都巡檢使未幾移瓊崖儋萬四州都巡檢使麾下軍士咸憚於行崇矩盡出器皿金帛凡直數百萬悉分給之衆乃感悅時黎賊擾動崇矩悉抵其洞穴撫慰以已財遺其會長衆皆懷附代還拜右千牛衛上將軍雍熙三年命代宋渥判右金吾街仗兼六軍司事端拱元年卒年六十五贈太尉諡元靖崇矩性純厚寡言尤重然諾嘗事史弘肇及卒見其子孫必厚禮之振其乏絕在嶺海四五年恬不以炎荒嬰慮舊涉海者多艤舟以俟便風或旬餘或彌月崇矩往來皆一日而渡未嘗留滯士卒僮僕隨者皆無恙信奉釋氏飯僧至七十萬造像建寺尤多又喜黃白術自遠迎其人館於家以師之雖知其詐猶以爲神仙試已終無悔恨子繼昌

繼昌字世長初崇矩與太祖同府厚善每太祖誕辰必遣繼昌奉幣爲壽嘗畀弱弓輕矢教以射法建隆三年蔭補西頭供奉官太祖欲選尚公主崇矩謙讓不敢當繼昌亦自言不願崇矩亟爲繼昌聘婦太祖聞之頗不悅開寶五年選魏咸信爲駙馬都尉繼昌同日遷如京副使崇矩出華州補鎮國軍牙職入爲右班殿直東頭供奉官監大名府商稅歲課增羨會詔擇廷臣有勞者

府以名聞丁外艱服闋授西京作坊副使淳化中齊饑多盜命爲登萊沂密七州都巡檢使至道二年蜀賊平餘黨頗嘯聚拜西京作坊使峽路二十五州軍捉賊招安都巡檢使旋改兵馬鈐轄賊酋喻雷燒者久爲民患以金帶遺繼昌繼昌爲納之賊懈不設備因掩殺之進西京左藏庫使咸平三年王均亂蜀與雷有終上官正石普同受詔進討砦于城西門賊忽開城僞遁有終等各以所部徑入繼昌覺亟止之不聽因獨還砦賊果閉關發伏悉陷之有終等僅以身免繼昌按堵如故所部諸校聞城中戰聲泣請引去繼昌曰吾位最下當俟主帥命

是夕有終馳報至徙繼昌屯鴈橋門三月破彌牟砦斬首千級大獲器仗進逼魚橋門均脫走繼昌入城嚴戒部下無擾民者獲婦女童幼置空寺中俟事平遣還其家繼昌急領兵追賊至資州聞均梟首乃還以功領獎州刺史俄知青州入掌軍頭引見司景德二年將幸澶州遣先赴河上給諸軍鎧甲遼人請和欲近臣克使乃令繼昌與其使姚東之偕詣遼部俄與韓杞同至行在及遼人聘至又命至境首接伴尋擢爲西上閣門使三年又副任中正使契丹是冬將朝陵寢以汝州近洛衛兵所駐命知州事兼兵馬鈐轄駕還召歸出知延州兼

鄜延路鈐轄大中祥符元年進秩東上閣門使俄以目疾求歸京師入對勞問再三遣尚醫診視假滿仍給以奉少愈令樞密院傳旨將真拜刺史復任延安繼昌以疾表求休致未幾改右驍衛大將軍領郡如故祀汾陰留爲京師新城巡檢鈐轄改左神武軍大將軍權判右金吾街仗其子遵勗尚萬壽長公主天禧初主誕日邀繼昌過其家迎拜爲壽帝知之密以襲衣金帶器幣珍果美饌賜之翌日主入對帝問繼昌彊健能飲食拜連州刺史出知涇州表求兩朝御書及謁拜諸陵皆許之二年冬卒年七十二遣中使護櫬以歸錄其子贊善大

夫文晟爲殿中丞殿直文且爲侍禁繼昌性謹厚士大夫樂與之遊爲治尚寬所至民懷之任峽路時與上官正聯職正殘忍好殺嘗有縣胥護芻糧地遠後期正令斬之繼昌徐爲解貸焉鄭伸者早死其母貧餓嘗詣繼昌乞丐家人競前訴逐繼昌召見與白金百兩時人稱之遵勗初尚主詔升爲崇矩子授昭德軍留後駙馬都

尉

王仁贍唐州方城人少儻不事生產委質刺史劉詞詞遷未與節度署爲牙校詞將卒遺表薦仁贍材可用太祖素知其名請於世宗以隸帳下宋初授武德使出

知秦州改左飛龍使建隆二年遷右領軍衛將軍充樞密承旨高繼沖請命以仁贍爲荆南巡檢使繼沖入朝命知軍府乾德初遷左千牛衛大將軍不踰月加內客省使二年春召赴闕擢爲樞密副使七月加左衛大將軍與師討蜀命仁贍爲鳳州路行營前軍都監蜀平坐沒人生口財貨殺降兵致蜀土擾亂責授右衛大將軍初劍南之役大將王全斌等貪財軍政廢弛寇盜克斤太祖知之每使蜀來者令陳全斌等所入賄賂子女及發官庫分取珠金等事盡得其狀及全斌等歸帝詰仁贍仁贍歷詆諸將過失欲自解帝曰納李廷珪妓女開豐德庫取金寶豈全斌輩邪仁贍不能對廷珪故蜀將也帝怒令送中書鞫全斌等罪仁贍以新立功第行降黜而已帝幸洛以仁贍判留守司三司兼知開封府事及召沈倫赴行在以仁贍爲東京留守兼大內都部署駕還遂判三司俄命權宣徽北院事太平興國初拜北院使兼判如故加檢校太保四年親征太原克大內部署仍判留守司三司總轄裏外巡檢司公事師還加檢校太傅五年仁贍廉得近臣戚里遣人市竹木秦隴間聯巨筏至京師所過關渡矯稱制免筭旣至厚結有司悉官市之倍收其直仁贍密奏之帝怒以三司副使范

旻戶部判官杜載開封府判官呂端屬吏旻載具伏罔
上爲市竹木入官端爲秦府親吏喬璉請託執事者貶
旻爲房州司戶載均州司戶端商州司戶判四方館事
程德玄武德使劉知信翰林使杜彥圭日騎天武四廂
都指揮使趙延溥武德副使竇神興左衛上將軍張永
德左領軍衛上將軍祁廷訓駙馬都尉王承衍石保吉
魏咸信並坐販竹木入官責降罰奉是歲車駕北巡命
仁贍爲大內部署七年春以政事與僚屬相矛盾爭辯
帝前仁贍辭屈責授右衛大將軍翌日改唐州防禦使
月給奉錢三十萬仁贍之獲罪也兵部郎中判勾院宋
琪及三司判官並降秩先是仁贍掌計司殆十年恣下
吏爲奸怙恩寵無敢發者前者發范旻等事中外益畏
其口會屬吏陳恕等數人率以噉察不畏強禦自任因
議本司事有不協者朝參日恕獨出班持狀奏其事帝
詰之仁贍屈伏帝怒甚故及於譴而恕等悉獎擢琪與
恕等聯事始合謀同奏至帝前而宋琪猶附會仁贍故
亦左降仁贍旣失權勢因怏怏成疾數日卒年六十六
後帝因言及三司財賦謂宰相趙普等曰王仁贍領邦
計積年恣吏爲姦諸場院官皆隱沒官錢以千萬計朕
悉令罷之命使分掌仁贍再三言恐虧舊數朕拒之未

踰年舊獲千緡者爲一二萬緡萬緡者爲六七萬緡其利數倍用度旣足儻遇水旱即可免民租稅仁瞻心知其非頗亦慙悻朕優容之子昭雍爲崇儀副使

楚昭輔字拱辰宋州宋城人少事華帥劉詞詞卒事太祖隸麾下以才幹稱甚信任之陳橋師還昭憲太后在城中太祖憂之遣昭輔問起居昭輔具言士衆推戴之狀太后乃安宋初爲軍器庫使太祖親討澤潞及征淮揚並以昭輔爲京城巡檢建隆四年權知揚州使江表還命鈞校左藏庫金帛數日而畢條對稱旨開寶四年帝以其能心計拜左驍衛大將軍權判三司六年遷樞

密副使九年命權宣徽南院事太平興國初拜樞密使

三年加檢校太傅從征太原加檢校太尉俄以足疾請告帝親臨問以所居湫隘命有司廣之昭輔慮侵民地固讓不願治帝嘉其意賜白金萬兩令別市第昭輔被疾家居近一歲始以石熙載代之昭輔不求解職上亦不忍罷會郊祀畢罷爲驍騎衛上將軍逾年卒年六十九廢朝贈侍中命中使護其喪歸葬鄉里無子錄其兄子吉爲供奉官敏爲殿直昭輔性勤介人不敢干以私然頗吝嗇前後賜予萬計悉聚而畜之嘗引賓客故舊至藏中縱觀且曰吾無汗馬勞徒以際會得此吾爲國

家守爾後當獻于上及罷機務悉以市善田宅時論鄙
之初詞卒昭輔來京師問卜於瞽者劉悟悟爲筮卦曰
汝遇貴人見奇表豐下者卽汝主也宜謹事之汝當貴
矣及見太祖狀貌如悟言遂委質焉咸平三年錄弟之
子諒爲借職大中祥符八年又錄從孫鼎爲右班殿直
吉至內殿崇班吉子隨敏子咸並進士及第隨爲太常
博士咸屯田員外郎

李處耘潞州上黨人父肇仕後唐歷軍校至檢校司徒
從討王都定州契丹來援唐師不利肇力戰死之晉末
處耘尚幼隨兄處疇至京師遇張彥澤斬關而入縱士
卒剽略處耘年猶未冠獨當里門射殺十數人衆無敢
當者會暮夜遂退追曉復鬪又殺數人關未解有所親
握兵聞難來赴遂得釋里中賴之漢初折從阮帥府州
召置門下委以軍務從阮後歷鄆滑陝邠四節度處耘
皆從之在新平日折氏甥詣闕誣告處耘之罪周祖信
之黜爲宜祿鎮將從阮表雪其冤詔復隸麾下顯德中
從阮遺表稱處耘可用會李繼勳鎮河陽詔署以右職
繼勳初不爲禮因會將吏宴射處耘連四發中的繼勳
大奇之令升堂拜毋稍委郡務俾掌河津處耘白繼勳
曰此津往來者懼有姦焉不可不察也居數月果得契

丹謀者索之有與西川江南蠟書卽遣處耘部送闕下
太祖時領殿前親軍繼勳罷鎮世宗以處耘隸太祖帳
下補都押衙會太祖出征駐軍陳橋處耘見軍中謀欲
推戴遽白太宗與王彥昇謀召馬仁瑀李漢超等定議
始入白太祖太祖拒之俄而諸軍大譟入驛門太祖不
能却處耘臨機決事謀無不中太祖嘉之授客省使兼
樞密承旨右衛將軍從平澤潞遷羽林大將軍宣徽北
院使討李重進爲行營兵馬都監賊平以處耘知揚州
大兵之後境內凋弊處耘勤於綏撫奏減城中居民屋
稅民皆悅服建隆三年詔歸京師老幼遮道涕泣累日
不得去拜宣徽南院使兼樞密副使賜甲第一區朗州
軍亂詔慕容延釗率師討之以處耘爲都監入辭帝親
授方略令會兵漢上先是朝廷遣內酒坊副使盧懷忠
使荆南覘勢強弱使還具言可取之狀遂命處耘圖之
處耘至襄州先遣閣門使丁德裕假道荆南請具薪水
給軍荆人辭以民庶恐懼願供芻餼於百里外處耘又
遣德裕諭之乃聽命遂令軍中曰入江陵城有不由路
及擅入民舍者斬師次荆門高繼沖遣其叔保寅及軍
校梁延嗣奉牛酒犒師且來覘也處耘待之有加諭令
翌日先還延嗣大喜令報繼沖以無虞荆門距江陵百

餘里是夕召保寅等飲宴延釗之帳處耘密遣輕騎數千倍道前進繼沖但俟保寅延嗣之還遽聞大軍奄至卽惶怖出迎遇處耘於江陵北十五里處耘揖繼沖令待延釗遂率親兵先入登北門比繼沖還則兵已分據城中荆人束手聽命卽調發江陵卒萬餘人并其師晨夜趨朗州又先遣別將分麾下及江陵兵趨岳州大破賊於三江口獲船七百餘艘斬首四千級又遇賊帥張從富於澧江擊敗之逐北至敖山砦賊棄砦走俘獲甚衆處耘釋所俘體肥者數十人令左右分啗之黥其少健者令先入朗州會暮宿砦中遲明延釗大軍繼至黥者先入城言被擒者悉至大軍所啗朗人大懼縱火焚城而潰會朗帥周保權年尚幼爲大將汪端却匿於江南砦僧寺中處耘遣麾下將田守奇帥師渡江獲之遂入潭州盡得荆湖之地初師至襄州衛肆鬻餅者率減少倍取軍人之直處耘捕得其尤者二人送延釗延釗怒不受往復三四處耘遂命斬於市以徇延釗所部少校司義舍於荊州客將王氏家使酒兇恣王氏愬於處耘處耘召義呵責義又譖處耘於延釗至白湖處耘望見軍人入民舍良久舍中大呼求救遣捕之卽延釗圍人也乃鞭其背延釗怒斬之由是大不協更相論奏

朝議以延釗宿將賞其過謫處耘爲淄州刺史處耘懼不敢自明在州數年乾德四年卒年四十七廢朝贈宣德軍節度檢校太傅賜地葬於洛陽偏橋村處耘有度量善談當世之務居常以功名爲已任荆湖之役處耘以近臣護軍自以受太祖之遇思有以報故臨事專制不顧羣議遂至於貶後太祖頗追念之及開寶中爲太宗納其次女爲妃卽明德皇后也子繼隆繼和自有傳繼恂官至洛苑使順州刺史贈左神武大將軍繼恂子昭遜爲供備庫使處疇官至作坊使子繼凝

繼隆字霸圖幼養於伯父處疇及長以父蔭補供奉官

處耘貶淄州繼隆亦除籍會長春節與其母入貢猶以舊

官時權臣與處耘有宿憾者忌繼隆有才繼隆因落魄不治產以游獵爲娛乾德中平蜀選爲果閬監軍年方弱冠毋憂其未更事將輔以處耘左右繼隆曰是行兒自有立豈須此輩願不以爲慮毋慰而遣之代還夜涉棧道雨滑與馬偕墜絕澗深十餘丈絙於大樹騎卒馳數十里外取火引縷以出之會征江南領雄武卒三百戍邵州止給刀盾蠻賊數千陣長沙南截其道繼隆率衆力戰賊遁去手足俱中毒矢得良藥而愈部卒死傷者三之一太祖聞其勇敢而器重之又與石曦率兵襲

袁州破桃田砦追賊二十里入潭富砦焚其梯衝芻積復從李符督荆湖漕運給征南諸軍吳人以王師不便水戰多出舟師斷餉道繼隆屢與鬪糧悉善達日馳四五百里常令往來覘候一日中途遇虎射殺之嘗獲吳將部送赴闕至項縣而病斬其首以獻太祖益嘉之與吳人戰流矢中額以所冠胄堅厚得不傷太祖察其才且追念其父欲拔用之謂曰昇州平可持捷書來當厚賞汝時內侍使軍中者十數輩皆伺城陷獻捷會有機事當入奏皆不願行而繼隆獨請赴闕太宗見其來時城尚未下甚訝之繼隆度金陵破在旦夕因言在途遇

大風晦暝城破之兆也翌日捷奏至太祖召謂曰如汝所料矣吳將盧絳聚眾萬餘攻掠州縣命繼隆招來之江南平錄功遷莊宅副使從幸西洛改御營前後巡檢使太平興國二年改六宅使嘗詔與王文寶李神祐劉承珪同護浚京西河又與梁迥竇神寶治決河迴體肥碩所乘舟不能濟繼隆易以已舟已而繼隆舟果覆樓枯桑杪賴他舟以度從征太原爲四面捷舉都監與李漢瓊領梯衝地道攻城西面機石過其旁從卒仆死繼隆督戰無怠討幽州與郭守文領先鋒破契丹數千眾及圍范陽又與守文爲先鋒大敗其衆于湖翟河南

後爲鎮州都監契丹犯邊與崔翰諸將禦之初太宗授以陣圖及臨陣有不便衆以上命不可違繼隆曰事有應變安可預定設獲違詔之罪請獨當也卽從宜而行敗之于徐河四年遷宮苑使領媯州刺史護三交屯兵與潘美出征北邊破靈丘縣盡略其人以歸改定州駐泊都監嘗領兵出土鐙砦與賊戰獲牛羊車帳甚衆詔書長美李繼遷叛命繼隆與田仁朗王侁率兵擊之四月出銀州北破悉和諸族追奔數十里斬三千餘級俘潘漢老幼千餘梟代州刺史折羅遇及其弟埋乞首牛馬鎧仗所獲尤多又出開光峇西杏子坪破保寺保香族斬其副首領埋也巴五十七人降銀三族首領折八軍等二千餘衆復破沒邵浪悉訛諸族及濁輪川東克頭川西生擒七十八人斬首五十九級俘獲數千計引師至監城吳移越移四族來降惟岌伽羅膩十四族怙其衆不下迺與尹憲襲擊之夷其帳千餘俘斬七千餘級俄改領環州團練使又護高陽關屯兵從曹彬征幽州率兵助先鋒薛繼昭破其衆數千於固安南下固安新城進克承州矢中左股血流至踵獲契丹貴臣一人彬欲上其功繼隆止之俄而傅潛米信軍敗衆潰獨繼隆所部振旅而還卽命繼隆知定州尋詔分屯諸軍繼

隆令書吏盡錄其詔旬餘有敗卒集城下不知所向繼隆按詔給券俾各持詣所部太宗益嘉其有謀三年遷侍衛馬軍都虞候領武州防禦使契丹大人邊出爲滄州都部署劉廷讓與敵戰君子館先約繼隆以精卒後殿緩急爲援旣而敵圍廷讓數重繼隆引麾下兵退保樂壽廷讓力不敵全軍陷沒裁以單騎遁免上怒追繼隆赴闕令中書問狀旣而得釋逾年加領本州觀察使端拱初制授侍衛馬軍都指揮使領保順節度九月出爲定州都部署初朝議有寇至令堅壁清野勿與戰一日契丹驟至攻蒲城至唐河護軍袁繼忠慷慨請出師中黃門林延壽等五人以詔書止之繼隆曰關外之事將帥得專乃與繼忠出兵戰數合擊走之二年冬送芻粟入威虜軍蕃將于越率騎八萬來邀王師繼隆所領步騎裁一萬先命千人設伏城北千里而與尹繼倫列陣以待敵衆方食繼倫出其不意擊走之繼隆追奔過徐河俘獲甚衆嘗有詔廢威虜軍繼隆言梁門爲北面保障不可廢遂城守如故訖爲要地淳化初上遣使至定州密諭繼隆若契丹復入寇朕當親討繼隆上奏曰自北邊肆孽邊邑多虞陛下不知臣不材任以疆事臣敢不講求軍實震耀戎容奉揚天聲以遏外侮然臣奉

辭之日曾瀝愚衷誠以蜂蟻之妖必就鯨鯢之戮臣子之分死生以之望不議於親巡庶靡勞於天步今聆聖誨將決親征且一人既行百司景從次舍驅馳郡縣供饋勞費滋甚矜此微妖當責將帥臣雖駑弱誓死爲期是歲契丹不入邊議遂止四年夏召還太宗面獎之改領靜難軍節度復遣還屯所時夏州趙保忠與繼遷連謀朝廷患之又綏州牙校高文岷舉城效順河外蕃漢大擾以繼隆爲河西行營都部署尚食使尹繼隆爲都監以討之旣而繼遷遁去擒保忠以獻初裨將侯延廣監軍秦翰議請誅保忠及出兵追之繼隆曰保忠死上

肉爾當請於天子今繼遷遁去千里窮磧艱於轉餉宜養威持重未易輕舉延廣等服其言會密詔廢夏州隴其城繼隆命秦翰與弟繼和及高繼勳同入奏以爲朔方古鎮賊所窺覷之地存之可依以破賊并請於銀夏兩州南界山中增置保戍以扼其衝且爲內屬蕃部之障蔽而斷賊糧運皆不報至道二年白守宗守榮馬紹忠等送糧靈州爲繼遷所邀敗於洛浦河上聞之怒亟命繼隆爲靈環十州都部署是秋五路討繼遷以繼隆出環州取東關鎮由赤檉苦井路赴之繼隆以所出道回遠乏水請由橐駝路徑趨賊之巢穴且遣繼和入奏

太宗召詰之知其必敗因遣周瑩齋手詔切責督其進軍赤檉瑩至繼隆以便宜發兵不俟報與丁罕行十餘日果不見賊而還諸將失期士卒困乏繼隆素剛因慙憤肆殺戮乃奏轉運使陳絳梁鼎軍儲不繼並坐削秩三年春繼遷以蕃部從順者衆遣其軍主史乂遇率兵屯橐駝口西北雙雉以遏絕之執倉族蕃官乂遇來告繼隆遣劉承蘊田敏會乂遇討之斬首數千級獲牛馬橐駝萬計先是受詔送軍糧赴靈州必由旱海路自冬至春而芻粟始集繼隆請由古原州蔚茹河路便衆議不一繼隆固執論其事太宗許焉遂率師以進壁古原州令如京使胡守澄城之是爲鎮戎軍真宗卽位改鎮安軍節度檢校太傅踰月召還加同中書門下平章事解兵柄歸本鎮咸平二年丁內艱起復會秋潦暴集蔡水壞岸繼隆乘危督士卒補塞自辰訖午衝波稍息四年加檢校太師王師失利於望都繼隆累表求詣關面陳邊事因乞自效俄召還延見詢訪因言醜類侵擾蓋亦常事願委將帥討伐不煩親征真宗慰諭之改山南東道節度判許州景德初明德皇太后不豫召入省疾九月復許會葬是冬契丹大入踰魏郡至河上真宗幸澶淵繼隆表求扈從命爲駕前東西排使先赴澶

州陳師於北城外毀車爲營敵數萬騎急攻繼隆與石
保吉率衆禦之追奔數里及上至幸北門觀兵召問慰
勞見其所部整肅歎賞久之翌日幸營中召從臣飲宴
二年春還京加開府儀同三司食邑實封詔始下會疾
作上親臨問繼和時爲并代鈐轄驛召省視卒年五十
六車駕臨哭之慟爲制服發哀贈中書令諡忠武以其
子昭慶爲洛苑使從子昭 昭遜並爲內殿崇班又錄
其門下二十餘人乾興初詔與李沆王旦同配享真宗
廟庭繼隆出貴胄善騎射曉音律感慨自樹深沉有城
府嚴於御下好讀春秋左氏傳喜名譽賓禮儒士在太

宗朝特被親信每征行必委以機要真宗以元舅之親
不欲煩以軍旅優游近藩恩禮甚篤然多智用能謙謹
保身明德寢疾欲面見之上促其往繼隆但詣萬安宮
門拜牋終不入又嘗命諸王詣第候謁繼隆不設湯茗
第假王府從行茶爐烹飲焉昭慶改名昭亮至東上閣
門使高州刺史

繼和字周叔少以蔭補供奉官三遷洛苑使淳化後繼
隆多在邊任繼和常從行友愛尤至每令人奏機事繼
隆罷兵柄手錄唐李勣遺戒授繼和曰吾門不墜者在
爾矣初繼隆之請城鎮戎軍也朝廷不果於行繼和面

奏曰平涼舊地山川險阻旁扼夷落爲中華襟帶城之
爲便太宗乃許焉後復不守咸平中繼和又以爲言乃
命版築以繼和知其軍兼原渭儀都巡檢使城畢加領
平州刺史建議募貧民及弓箭手墾田積粟又屢請益
兵朝議未許上曰苟緩急部署不爲濟師則或至失援
矣命繼和兼涇原儀渭鈐轄時繼遷未弭命張齊賢梁
顥經略因訪繼和邊事繼和上言鎮戎軍爲涇原儀渭
北面扞蔽又爲環慶原渭儀秦熟戶所依正當回鶻西
涼六谷吐蕃咩逋賤遇馬臧梁家諸族之路自置軍已
乘克張邊備方於至道中所葺今已數倍誠能常用步
騎五千守之涇原渭州苟有緩急會于此軍并力戰守
則賊必不敢過此軍而緣邊民戶不廢耕織熟戶老幼
有所歸宿此軍苟廢則過此新城止皆廢壘有數路來
寇若自隴山下南去則由三百堡入儀州制勝關自瓦
亭路南去則由彈箏峽入渭州安國鎮自清石嶺東南
去則由小盧大盧潘谷入潘原縣若至潘原而西則入
渭州東則入涇州若自東石嶺東公主泉南去則由東
山砦故彭陽城西並入原州其餘細路不可盡數如以
五千步騎令四州各爲備禦不相會合則兵勢分而力
不足禦矣故置此城以扼要路卽令自靈環慶鄜延石

隰麟府等州以外河曲之地皆屬於賊若更攻陷靈州
西取回鶻則吐蕃震懼皆爲吞噬西北邊民將受驅劫
若以可惜之地甘受賊攻便思委棄以爲良策是則有
盡之地不能供無已之求也臣慮議者以調發芻糧擾
民爲言則此軍所費上出四川地里非遙輸送甚易又
劉琮方興屯田屯田若成績中有備則四州稅物亦不
須得況今繼遷強盛有踰曩日從靈州至原渭儀州界
次更取鋁子山以西接環州山內及平夏次并黃河以
東以南隴山內外交儀州界及靈州以北河外蕃部約
數十萬帳賊來足以鬪敵賊遷未盛不敢深入今則靈
州北河外鎮戎軍環州並北徹靈武平夏及山外黃河
以東族帳悉爲繼遷所吞縱有一二十族殘破奔迸事
力十無二三自官軍瀚海失利賊愈猖狂羣蕃震懼絕
無鬪志兼以咸平二年棄鎮戎後繼遷徑來侵掠軍界
蕃族南至渭州安國鎮北一二十里西至南市界三百
餘里便於蕭關屯聚萬子米道西鼠等三千以脅原渭
靈環熟戶常時族帳謀歸賊者甚多賴聖謨深遠不惑
羣議復置此軍一年以來蕃部咸以安集邊民無復愁
苦以此較之則存廢之說相失萬倍矣又靈州遠絕居
常非有尺布斗粟以供王府今關西老幼疲苦轉餉所

以不可棄者誠恐滋大賊勢使繼遷西取秦成之羣蕃
北掠回鶻之健馬長驅南牧何以枝梧昨朝廷訪問臣
送芻糧道路臣欲自蕭關至鎮戎城砦西就胡盧河川
運送但恐靈州食盡或至不守清遠固亦難保青岡白
馬曷足禦扞則環州便爲極邊若賊從蕭關武延石門
路入鎮戎縱有五七千兵亦恐不敵卽回鶻西涼路亦
斷絕伏見咸平三年詔書緣邊不得出兵生事蕃夷蓋
謂賊如猛獸不拂其心必且不動臣愚慮此賊他日愈
熾不若聽驍將銳旅屢入其境彼或聚兵自固則勿與
關妖黨纔散則令掩擊如此則王師逸而賊兵勞賊心

內離然後大舉及靈州孤壘戍守最苦望比他州尤加
存恤且守邊之臣內憂家屬之窘匱外憂姦邪之憎毀
憂家則思爲不廉憂身則思爲退迹思不廉則官局不
治思退迹則庶事無心欲其奮不顧身令出惟行不可
得已良由賞未厚恩未深也賞厚則人無顧內之憂恩
深則士有效死之志古之帝王皆懸爵賞以拔英俊卒
能成大功大凡君子求名小人徇利臣爲兒童時嘗聞
齊州防禦使李漢超守關南齊州屬州城錢七八萬貫
悉以給與非次賞資動及千萬漢超猶私販權場規免
商筭當時有以此事達于太祖者卽詔漢超私物所在

悉免關征故漢超居則營生戰則誓死貲產厚則心有
所繫必死戰則動有成績故畢太祖之世一方爲之安
靜今如漢超之材固亦不少苟能用皇祖之遺法選擇
英傑使守靈武高官厚賞不吝先與往日留半奉給其
家半奉資其用然後可以責潔廉之節保必勝之功也
又戎事內制或失權宜漢時渤海盜起龔遂爲太守尚
聽便宜從事且渤海漢之內地盜賊國之饑民況靈武
絕塞西鄙疆戎又非渤海之比苟許其專制則無失事
機縱有營私冒利民政不舉亦乞不問用將之術異於
他官貪勇智愚無不皆錄但使法寬而人有所慕則又

居者安心展體竭材盡慮何患靈州之不可守哉又朝
廷比禁青鹽甚爲允愜或聞議者欲開其禁且鹽之不
入中土因賊之良策也今若謂糧食自蕃界來雖鹽禁
不能因賊此鬻鹽行賄者之妄談也蕃粟不入賊境而
入于邊廩其利甚明況漢地不食青鹽熟戶亦不入蕃
界博易所禁者非徒糧食也至於兵甲皮韎之物其名
益多以朝廷雄富雅言摘山煮海一年商利不入則或
闕軍須況蕃戎所賴止在青鹽禁之則彼自困矣望固
守前詔爲便五年繼和領兵殺衛埋族於天麻川自是
壠山外諸族皆恐懼內附願於要害處置族帳砦柵以

爲戍守繼和因請移涇原部署於鎮戎以壯軍勢又請
開道環延爲應援真宗以其精心戎事甚嘉之戎人伺
警巡弛備一夕塞長壕越古長城抵城下繼和與都監
史重貴出兵禦之賊據險再突城隍列陣接戰重貴中
重創敗走之大獲甲騎有詔嘉獎別出良藥縑帛牢酒
以賜繼和習武藝好談方略頗知書所至幹治然性剛
忍御下少恩部兵終日環甲常如寇至及較閱之際杖
罰過當人多怨焉真宗屢加勗勵且爲覆護之嘗上言
保捷軍新到屯所多亡命者請優賜緡錢苟有亡逸卽
按軍法舊制凡賜軍中緡緣奏請者亦以特旨給之上
以繼和峻酷欲軍士感其忠特令以所奏著詔書中而
加賜之且以計情定罪自有常制不許其請終以邊防
之地慮人不爲用遣張志言代還旣卽路軍中皆恐其
復來六年又出爲并代鈐轄將行請對欲領兵去按度
邊壘上曰河東巖險兵甲甚衆賊若入寇但邀其歸路
自可致勝不必率兵而往也景德初北邊入寇徙北平
砦車駕駐澶淵繼和受詔與魏能張凝領兵赴趙州躡
敵後契丹請和邊民猶未寧又命副將張凝爲緣邊巡
檢安撫使事平復還并代時朝廷每詔書約束邊事或
有當行極斷之語官吏不詳深意卽處大辟繼和言其

事乃詔自今有云重斷極斷處斬決配之類悉須裁奏
先是繼隆卒繼和耻以遺奏得官久之遷西上閣門使
未幾擢殿前都虞候領端州防禦使大中祥符元年卒
年四十六贈鎮國軍節度遣諸王率宗室素服赴弔二
子早卒帝以其族盛大諸姪皆幼令三班選使臣為主
家事弟繼恂至洛苑使順州刺史贈左神武大將軍子
昭遜爲供備庫使

論曰夫乘風雲之會依日月之光感慨發憤效忠駿奔
居備要任出程重兵如是而令名克終斯固可偉也吳
延祚策李筠之破如日觀其事誠有將略李崇矩秉純
厚之德感史弘肇之恩保其叛亡之孥然交卹伸不知
其傾險坐謫炎海固無先見之明矣其子繼昌忘父仇
以恤伸母之貧雖非中道亦人所難王仁贍征蜀殺降
附之卒肆貪矯之行鬱鬱而斃自貽伊戚尚何尤乎楚
卞輔當陳橋推戴太祖遣之入安母后亦必可託以事
者及爲三司善於心計人不可干以私然終以訐直取
寡信之名何歟處耘於創業之始功參締構克荆山靖
衡湘勢如拉枯而志味在和勲業弗究良可惜也幸聯
戚畹之貴秉旄繼世抑造物之報嗇此而豐彼歟

開府儀同三司上柱國錄軍國重事前書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監書事臣黃汝良等奉

勅重校刊

曹彬 子璨璋琮

潘美 李超附

曹彬字國華真定靈壽人父芸成德軍節度都知兵馬使彬始生周歲父母以百玩之具羅於席觀其所取彬左手持干戈右手持俎豆斯須取一印他無所視人皆異之及長氣質淳厚漢乾祐中為成德軍牙將節帥武

行德見其端懿指謂左右曰此遠大器非常流也周太祖貴妃張氏彬從母也周祖受禪召彬歸京師隸世宗帳下從鎮澶淵補供奉官擢河中都監蒲帥王仁鎬以彬帝戚尤加禮遇彬執禮益恭公府讌集端簡終日未嘗旁視仁鎬謂從事曰老夫自謂夙夜匪懈及見監軍矜嚴始覺已之散率也顯德三年改潼關監軍遷西上閤門使五年使吳越致命訖卽還私覲之禮一無所受吳越人以輕舟追遺之至於數四彬猶不受旣而曰吾終拒之是近名也遂受而籍之以歸悉上送官世宗強還之彬始拜賜悉以分遺親舊而不留一錢出爲晉州兵馬都監一日與主帥暨賓從還坐於野會鄰道守將走价馳書來詣使者素不識彬潛問人曰孰爲曹監軍有指彬以示之使人以爲紿已笑曰豈有國戚近臣而衣弋綈袍坐素胡床者乎審視之方信遷引進使初太祖典禁旅彬中立不倚非公事未嘗造門羣居讌會亦所罕預由是器重焉建隆二年自平陽歸召謂曰我疇昔常欲親汝汝何敢踈我彬頓首謝曰臣爲周室近親復忝內職靖恭守位猶恐獲過安敢妄有交結遷客者使與王全斌郭進領騎兵攻河東平樂縣降其將王超侯霸榮等千八百人俘獲千餘人旣而賊將改進率兵

來援三戰皆敗之遂建平樂爲平晉軍乾德初改左神
武將軍時初克遼州河東召契丹兵六萬騎來攻平晉
彬與李繼勳等大敗之於城下俄兼樞密承旨二年冬
伐蜀詔以劉光毅爲歸州行營前軍副部署彬爲都監
峽中郡縣悉下諸將咸欲屠城以逞其欲彬獨申令戢
下所至悅服上聞降詔褒之兩川平全斌等晝夜宴飲
不恤軍士部下漁奪無已蜀人苦之彬屢請旋師全斌
等不從俄而全師雄等構亂擁衆十萬彬復與光毅破
之于新繁卒平蜀亂時諸將多取子女王帛彬橐中唯
圖書衣衾而已及還上盡得其狀以全斌等屬吏謂彬
清介廉謹授宣徽南院使義成軍節度使彬入見辭曰
征西將士俱得罪臣獨受賞恐無以示勸上曰卿有茂
功又不矜伐設有微累仁贍等豈惜言哉懲勸國之常
典可無讓六年遣李繼勳党進率師征太原命爲前軍
都監戰洞渦河斬二千餘級俘獲甚衆開寶二年議親
征太原復命爲前軍都監率兵先往次團栢谷降賊將
陳廷山又戰城南薄于濠橋奪馬千餘及太祖至則已
分砦四面而自主其北六年進檢校太傅七年將伐江
南九月彬奉詔與李漢瓊田欽祚先赴荆南發戰艦潘
美帥步兵繼進十月詔以彬爲昇州西南路行營馬步

軍戰權都部署分兵由荆南順流而東破峽口砦進克池州連克當塗蕪湖二縣駐軍采石磯十一月作浮梁跨大江以濟師十二月大破其軍於白鷺洲八年正月又破其軍於新林港二月師進次秦淮江南水陸十餘萬陳於城下大敗之俘斬數萬計及浮梁成吳人出兵來禦破之於白鷺洲自三月至八月連破之進克潤州金陵受圍至是凡三時吳人樵采路絕頻經敗衄李煜危急遣其臣徐鉉奉表詣闕乞緩師上不之省先是大軍列三砦美居守北偏圖其形勢來上太祖指北砦謂使者曰吳人必夜出兵來寇爾亟去令曹彬速成深溝以自固無墮其計中既成吳兵果夜來襲美率所部依新溝拒之吳人大敗奏至上笑曰果如此長圍中彬每緩師冀煜歸服十一月彬又使人諭之曰事勢如此所惜者一城生聚若能歸命策之上也城垂克彬忽稱疾不視事諸將皆來問疾彬曰余之疾非藥石所能愈惟須諸公誠心自誓以克城之日不妄殺一人則自愈矣諸將許諾共焚香爲誓明日稍愈又明日城陷煜與其臣百餘人詣軍門請罪彬慰安之待以賓禮請煜入宮治裝彬以數騎待宮門外左右密謂彬曰煜入或不測奈何彬笑曰煜素悞無斷旣已降必不能自引決煜之

君臣卒賴保全自出師至凱旋士衆畏服無輕肆者及入見刺稱奉敕江南幹事回其謙恭不伐如此初彬之總師也太祖謂曰俟克李煜當以卿爲使相副帥潘美預以爲賀彬曰不然夫是行也仗天威遵廟謨乃能成事吾何功哉況使相極品乎美曰何謂也彬曰太原未平爾及還獻俘上謂曰本授卿使相然劉繼元未下姑少待之旣聞此語美竊視彬微笑上覺遽詰所以美不敢隱遂以實對上亦大笑乃賜彬錢二十萬彬退曰人生何必使相好官亦不過多得錢爾未幾拜樞密使檢校太尉忠武軍節度使太宗卽位加同平章事議征太原召彬問曰周世宗及太祖皆親征何以不能克彬曰世宗時史彥超敗于石嶺關人情驚擾故班師太祖頓兵甘草地會歲暑雨軍士多疾因是中止太宗曰今吾欲北征卿以爲何如彬曰以國家兵甲精銳翦太原之孤壘如摧枯拉朽爾何爲而不可太宗意遂決太平興國三年進檢校太師從征太原加兼侍中八年爲弭德超所誣罷爲太平軍節度使旬餘上悟其譖進封魯國公待之愈厚雍熙三年詔彬將幽州行營前軍馬步水陸之師與潘美等北伐分路進討三月敗契丹于固安破涿州戎人來援大破之于城南四月又與米信破契

丹于新城斬首二百級五月戰于岐溝關諸軍敗績退屯易州臨易水而營上聞亟令分屯邊城追諸將歸闕先是賀令圖等言於上曰契丹主少母后專政寵倖用事請乘其釁以取幽薊遂遣彬與崔彥進米信自雄州田重進趣飛狐潘美出鴈門約期齊舉將發上謂之曰潘美之師但先趣雲應卿等以十萬衆聲言取幽州且持重緩行不得貪利彼聞大兵至必悉衆救范陽不暇援山後矣旣而美之師先下寰朔雲應等州重進又取飛狐靈丘蔚州多得山後要害地彬亦連下州縣勢不振每奏至上已訝彬進軍之速及彬次涿州旬日食盡因退師雄州以援餉餽上聞之曰豈有敵人在前反退軍以援芻粟失策之甚也亟遣使止彬勿前急引師緣白溝河與米信軍會按兵養銳以張西師之勢俟美等盡略山後地會重進之師而東合勢以取幽州時彬部下諸將聞美及重進累建功而已握重兵不能有所攻取謀議蜂起彬不得已乃復裹糧再往攻涿州契丹大衆當前時方炎暑軍士乏困糧且盡彬退軍無復行伍遂爲所躡而敗彬等至詔鞫於尚書省令翰林學士賈黃中等雜治之彬等具伏違詔失律之罪彬責授右驍衛上將軍彥進右武衛上將軍信右屯衛上將軍餘以

決黜四年起彬爲侍中武寧軍節度使淳化五年徙平
盧軍節度真宗卽位復檢校太師同平章事數月召拜
樞密使咸平二年被疾上趣駕臨問手爲和藥仍賜白
金萬兩問以後事對曰臣無事可言臣二子材器可取
臣若內舉皆堪爲將上問其優劣對曰璨不如瑋六月
薨年六十九上臨哭之慟對輔臣語及彬必流涕贈中
書令追封濟陽郡王諡武惠且贈其妻高氏韓國夫人
官其親族門客親校十餘人八月詔彬與趙普配饗太
祖廟庭彬性仁敬和厚在朝廷未嘗忤旨亦未嘗言人
過失伐二國秋毫無所取位兼將相不以等威自異遇
士夫於塗必引車避之不名下吏每白事必冠而後見
居官奉入給宗族無餘積平蜀回太祖從容問官吏善
否對曰軍政之外非臣所聞也固問之唯薦隨軍轉運
使沈倫廉謹可任爲帥知徐州日有吏犯罪旣具案逾
年而後杖之人莫知其故彬曰吾聞此人新娶婦若杖
之其舅姑必以婦爲不利而朝夕笞詈之使不能自存
吾故緩其事然法亦未嘗屈焉北征之失律也趙昌言
表請行軍法及昌言自延安還被劾不得入見彬在宥
府爲請於上乃許朝謁子璨瑒瑋玘玗琮瑒娶秦王
女興平郡主至昭宣使玘左藏庫副使玘尚書虞部員

外郎珣東上閣門使琮西上閣門副使玘之女卽慈聖
光獻皇后也芸累贈魏王彬韓王玘吳王諡曰安禧玘
之子佾傳佾見外戚傳傳后兄也榮州刺史諡恭懷
璨字韜光性沉毅善射以蔭補供奉官常從彬征討得
與計議彬以爲類已特鍾愛焉遷宮苑副使出爲高陽
關及鎮魏并代趙五州都監雍熙中命知定州改尚食
使淳化二年領富州刺史徙知代州明年擢爲鎮州行
營鈐轄徙綏銀夏麟府等州鈐轄契丹入寇屢戰有功
諸將多欲窮追璨慮有伏力止之至道初遷四方館使
知靈州徙河西鈐轄改引進使范廷召將兵出塞命璨
爲之副丁外艱起復爲鄜延路副都部署拜趙州刺史
領武州團練使充麟府濁輪副都部署出蕃兵邀繼遷俘
馘甚衆入爲樞密都承旨改領亳州團練使契丹入寇
命爲鎮定高陽關三路行營都鈐轄領康州防禦使再
知定州明年冬拜侍衛馬軍副都指揮使天德軍節度
入爲東京舊城都巡檢使連拜彰國保靜武寧忠武等
軍節度使在禁衛十餘年未嘗忤旨天禧三年春以足
疾授河陽節度使同平章事卒年七十贈中書令諡武
懿璨起貴胄以孝謹稱能自奮厲以世其家習知韜畧
好讀左氏春秋善撫士卒兼著威愛雖輕財不逮其父

而敬仁和厚亦有父風子儀官至耀州觀察使

瑋字寶臣父彬歷武寧太平軍節度使皆以瑋爲牙內都虞候補西頭供奉官閣門祗候沉勇有謀喜讀書通春秋三傳於左氏尤深李繼遷叛諸將數出無功太宗問彬誰可將者彬曰臣少子瑋可任卽召見以本官同知渭州時年十九真宗卽位改內殿崇班知渭州馭軍嚴明有部分賞罰立決犯令者無所貸善用間周知虜動靜舉措如老將彬卒請持喪不允改閣門通事舍人遷西上閣門副使徙知鎮戎軍李繼遷虐用其國人瑋知其下多怨卽移書諸部諭以朝廷恩信撫養無所間

以動諸羌由是康奴等族請內附繼遷略西蕃還瑋邀擊于石門川俘獲甚衆以鎗戎軍據平地便於騎戰非中國之利請自隴山以東循古長城塹以爲限又以弓箭手皆土人習障塞蹊隧曉羌語耐寒苦官未嘗與兵械資糧而每戰輒使先拒賊恐無以責死力遂給以境內閒田春秋耕斂州爲出兵護作而蠲其租繼遷死其子德明請命于朝瑋言繼遷擅河南地二十年兵不解甲使中國有西顧之憂今國危子弱不卽捕滅後更強盛不可制願假臣精兵出其不意禽德明送闕下復河西爲郡縣此其時也帝方以恩致德明不報旣而西延

家妙俄熟魏數大族請拔帳自歸諸將猶豫不敢應瑋曰德明野心不急折其翮後必颺去即日將其士薄天都山受降者內徙德明不敢拒遷西上閣門使爲環慶路兵馬都鈐轄兼知汾州封泰山進東上閣門使帝以瑋習知河北事迺以爲真定路都鈐轄領高州刺史瑋嘗上涇原環慶兩道圖至是帝以示左右曰華夷山川城郭險固出入戰守之要舉在是矣因敕別繪二圖以一留樞密院一付本道俾諸將得按圖計事復爲涇原路都鈐轄兼知渭州與秦翰破章裡族于武延川分兵滅撥臧于平涼於是隴山諸族皆來獻地瑋築堡山外爲籠竿城募土兵守之曰異時秦渭有警此必爭之地也祀汾陰進四方館使踰年上表還州事願專督軍旅帝不欲遽更守臣以密詔敦諭之改引進使英州團練使復知秦州兼涇原儀渭鎮戎緣邊安撫使時唃廝囉強盛立遵佐之立遵乃上書求號贊普瑋言贊普可汗號也立遵一言得之何以處唃廝囉邪且復有求漸不可制迺以立遵爲保順軍節度使恩如廝鐸督西羌將舉事必先定約束號爲立文法唃廝囉使其舅賞樣丹與廝敦立文法於離王族謀內寇瑋陰結廝敦解寶帶予之廝敦感激求自效間謂瑋曰吾父何所使欲吾首

猶可斷以獻瑋曰我知賞樣丹時至汝帳下汝能爲我
取賞樣丹首乎廝敦愕然應之後十餘日果斷其首來
廝敦因獻南市地南市者秦渭之阨也瑋城之表廝敦
爲順州刺史初張 知秦州置四門砦侵奪羌地羌人
多叛去畏得罪不敢出瑋招出之令人馬贖罪還故地
至者數千人每送馬六十匹給采一端築弓門治方床
穰靜戎三陽定西伏羌永寧小洛門威遠十砦浚濠三
百八十里皆役屬羌廂兵工費不出民伏羌首領廝鷄
波李磨論私立文法瑋潛兵滅其帳其年唃廝囉率衆
數萬大人寇瑋迎戰二都谷追奔三十里斬首千餘級
獲馬牛雜畜器仗三萬餘遷各省使康州防禦使馬波
叱臈立柵野吳谷瑋選募神武軍二百人斬柵獲生口
擊畜甚衆宗哥大首領甘遵治兵于任奴川瑋遣間殺
遵及破魚角蟬所立文法于吹麻城旣而河州洮蘭安
江妙敦邈川黨通諸城皆納質爲熟戶時瑋作塹抵拶
囉隴拶囉隴西蕃要害地也先是瑋遣小吏楊知進護
賜物通甘州可汗王還過宗哥界立遵邀知進語曰秦
州大人直以兵入拶囉隴來幸爲我言願罷兵歲入貢
約蕃漢爲一家因使種人黨失畢陵從知進來獻馬自
是唃廝囉勢蹙退保磧中不出秦人請刻石紀功有詔

褒之天禧三年德明寇柔遠砦都巡檢楊承吉與戰不利以瑋爲華州觀察使鄜延路副都總管環慶秦等州緣邊巡檢安撫使委乞骨咩大門等族聞瑋至歸附者甚衆拜宣徽北院使鎮國軍節度觀察留後簽書樞密院事宰相丁謂逐寇準惡瑋不附已指爲準黨除南院使環慶路都總管安撫使乾興初謫左衛大將軍容州觀察使知萊州瑋以宿將爲謂所忌卽日上道從弱卒十餘人不以弓韞矢箠自隨謂敗復華州觀察使知青州徙天雄軍以彰化軍節度觀察留後知永興軍拜昭武軍節度使知天雄軍以疾守河陽數月爲真定府定州都總管改彰武軍節度使卒贈侍中謚武穆瑋用士得其死力平居甚閒暇及師出多奇計出入神速不可測一日張樂飲僚吏中坐失瑋所在明日徐出觀事而賊首已擲庭下矣嘗稱疾加砭艾臥閣內不出會賊至瑋奮起衰創被甲跨馬賊望見皆遯去將兵幾四十年未嘗少失利响厮囉聞瑋名卽望瑋所在東嚮合手加額契丹使過天雄部勒其下曰曹公在此毋縱騎馳驅也真宗慎兵事凡邊事必手詔詰難至十數反而瑋守初議卒無以奪後雖他將論邊事者往往密付瑋處之渭州有告戍卒叛入夏國者瑋方對客奕棋遽曰吾使

之行也夏人聞之卽斬叛者投其首境上羌殺邊民入羊馬贖罪瑋下令曰羌自相犯從其俗犯邊民者論如律自是無敢犯環慶屬羌田多爲邊人所市致單弱不能自存因沒彼中瑋盡令還其故田後有犯者遷其家內地所募弓箭手使馳射較強弱勝者與田二頃再更秋獲課市一馬馬必勝甲然後官籍之則加五十畝至三百人以上團爲一指揮要害處爲築堡使自塹其地爲方田環之立馬社一馬死衆出錢市馬降者旣多因制屬羌百帳以上其首領爲本族軍主次爲指揮使又其次爲副指揮使不及百帳爲本族指揮使其蕃落將校止於本軍敘進以其習知羌情與地利不可徙他軍也開邊濠率令深廣丈五尺山險不可塹者因其峭絕治之使足以限敵後皆以爲法天雄卒有犯盜者衆謂獄具必殺之瑋乃處以常法人或以爲疑瑋笑曰臨邊對敵斬不用命者所以令衆吾非好殺也治內郡安事此乎初守邊時山東知名士賈同造瑋客外舍瑋欲按邊卽同舍邀與俱同問從兵安在曰已具旣出就騎見甲士三千環列初不聞人馬聲同歸語人曰瑋殆名將也瑋爲將不如其父寬然自爲一家嘉祐八年詔配享仁宗廟庭

琮字寶章兄珣娶秦王女興平郡主琮幼時從主入禁
中太宗置膝上拊其背曰曹氏有功我家此亦佳兒也
及彬領鎮海軍節度使補衙內都指揮使彬卒時遷西
頭供奉宮閣門祇候勾當驥院羣牧估馬司市馬課
有羨再遷西上閣門副使與曹利用連姻利用貶出爲
河陽兵馬都監領內軍器庫遷東上閣門使榮州刺史
仁宗冊琮兄女爲后禮皆琮主辨除衛州團練使琮因
奏曰陛下方以至公屬天下臣旣備后族不宜冒恩澤
亂朝廷法族人敢因緣請託願致于理時論稱之出爲
環慶路馬步軍總管知邠州遷秦州防禦使秦鳳路副

都總管兼知秦州度美材爲倉廩大積穀古渭翼城

羌屢入鈔邊琮懷以恩信擊牛醢酒犒之多請內屬寶
元初南郊召入侍祠會元昊反拜同州觀察使復知秦
州上攻守禦三策久之兼同管勾涇原路兵馬定國軍
節度觀察留後劉平石元孫敗關輔震恐琮請籍民爲
義軍以張兵勢於是料簡鄉弓手數萬人賊寇山外還
天都劫儀秦屬戶琮發騎士設伏以待之賊遂引去琮
欲誘吐蕃犄角圖賊得西川舊賈使諭意而沙州鎮王
子遣使奉書曰我本唐甥天子實吾舅也自党項破甘涼
遂與漢隔今願率首領爲朝廷擊賊帝善琮策改陝西

副都總管經略安撫招討副使拜步軍副都指揮使與
夏竦屯鄜州還爲馬軍副都指揮使以疾卒帝臨奠后
并出臨喪就第成服贈安化軍節度使兼侍中諡忠恪
琮小心謹畏善贊謁御軍整嚴死時家無餘貲子侏皇
城使嘉州防禦使侏子詩尚魯國大長公主

潘美字仲詢大名入父璘以軍校戍常山美少倜儻隸
府中典謁嘗語其里人王密曰漢代將終君臣肆虐四
海有改卜之兆大丈夫不以此時立功名取富貴碌碌
與萬物共盡可羞也會周世宗爲開封府尹美以中涓
事世宗及卽位補供奉官高平之戰美以功遷西上閤

門副使出監陝州軍改引進使世宗將用師隴蜀命美

永興屯兵經度西事先是太祖遇美素厚及受禪命美
先往見執政諭旨中外陝帥袁彥兗悍信任羣小嗜殺
黷貨且繕甲兵太祖慮其爲變遣美監其軍以圖之美
單騎往諭以天命旣歸宜修臣職彥遂入朝上喜曰潘
美不殺袁彥能令來覲成我志矣李重進叛太祖親征
命石守信爲招討使美爲行營都監以副之揚州平留
爲巡檢以任鎮撫以功授秦州團練使時湖南叛將汪
端旣平人心未寧乃授美潭州防禦使嶺南劉鋹數寇
桂陽江華美擊走之溪峒蠻獠自唐以來不時侵畧頗

爲民患美窮其巢穴多所殺獲餘加慰撫夷落遂定乾
德二年又從兵馬都監丁德裕等率兵克郴州開寶三
年征嶺南以美爲行營諸軍都部署朗州團練使尹崇
珂副之進克富川銀遣將率衆萬餘來援遇戰大破之
遂克賀州十月又下昭桂連三州西江諸州以次降美
以功移南面都部署進次韶州韶廣之北門也賊衆十
餘萬聚焉美揮兵進乘之韶州遂拔斬獲數萬計銀窮
蹙四年二月遣其臣王珪詣軍門求通好又遣其左僕
射蕭濯中書舍人卓惟休奉表乞降美因諭以上意以
爲彼能戰則與之戰不能戰則勸之守不能守則諭之
降不能降則死不能死則亡非此五者他不得受美卽
令殿直冉彥袞部送濯等赴闕銀復遣其弟保興率衆
拒戰美卽率厲士卒倍道趨柵頭距廣州百二十里銀
兵十五萬依山谷堅壁以待美因築壘休士與諸將計
曰彼編竹木爲柵若攻之以火彼必潰亂因以銳師夾
擊之萬全策也遂分遣丁夫數千人持二炬間道造
其柵及夜萬炬俱發會天大風火勢甚熾銀衆驚擾來
犯美揮兵急擊之銀衆大敗斬數萬計長驅至廣州銀
盡焚其府庫遂克之擒銀送京師露布以聞卽日命美
與尹崇珂同知廣州兼市舶使五月拜山南東道節度

五年兼嶺南道轉運使土豪周思瓊聚衆負海爲亂美討平之嶺表遂安八年議征江南九月遣美與劉遇等率兵先赴江陵十月命美爲昇州道行營都監與曹彬偕往進次秦淮時舟楫未具美下令曰美受詔提驍果數萬人期於必勝豈限此一衣帶水而不徑度乎遂麾以涉大軍隨之吳師大敗及采石磯浮梁成吳人以戰艦二十餘鳴鼓泝流來趨利美麾兵奮擊奪其戰艦擒其將鄭賓等七人又破其城南水砦分舟師守之奏至太祖遣使令亟徙置戰櫂以防他變美聞詔卽徙軍是夜吳人果來攻砦不能克進薄金陵江南水陸十萬陳於城下美率兵龍襲擊大敗之李煜危甚遣徐鉉來乞緩師上不之省仍詔諸將促令歸附煜遷延未能決夜遣兵數千持炬鼓譟來犯我師美率精銳以短兵接戰因與大將曹彬率士晨夜攻城百道俱進金陵平以功拜宣徽北院使秋命副党進攻太原戰于汾上破之且多擒獲太平興國初改南院使三年加開府儀同三司四年命將征太原美爲北路都招討判太原行府事部分諸將進討并州遂平繼征范陽以美知幽州行府事及班師命兼三交都部署留屯以捍北邊三交西北三百里地名固軍其地險阻爲北邊咽喉美潛師襲之遂據

有其地因積粟屯兵以守之自是北邊以寧美嘗巡撫至代州既秣馬蓐食俄而遼兵萬騎來寇近塞美誓衆銜枚奮擊大破之封代國公八年改忠武軍節度進封韓國公雍熙三年詔美及曹彬崔彥進等北伐美獨拔寰朔雲應等州詔內徙其民會遼兵奄至戰於陳家谷口不利驍將楊業死之美坐削秩三等責授檢校太保明年復檢校太師知真定府未幾改都部署判并州加同平章事數月卒年六十七贈中書令諡武惠咸平二年配饗太宗廟庭子惟德至宮苑使惟固西上閣門使惟正西京作坊使惟清崇儀使惟熙娶秦王女平州刺

史惟熙女卽章懷皇后也美後追封鄭王以章懷故也惟吉美從子累資爲天雄軍駐泊都監雖連戚里能以禮法自飭歟歷中外人咸稱其勤敏云一人香益李超者冀州信都人爲禁卒常從潘美軍中主刑刀美好乘怒殺人超每潛緩之美怒解輒得釋以是全者甚衆人謂其有陰德子濬字德淵中進士累擢祕書知康州咸平中入爲刑部詳覆御史臺推直官屢上書言事遷開封府推官賜緋魚景德初拜虞部員外郎兼侍御史知雜事賜金紫從幸澶淵頗上疏言便宜師還命與陳堯咨安撫河北踰年判吏部銓濬居憲府未再歲帝

寵待之擢樞密直學士宰相王旦言濬雖有剽劇才然驟歷清切時望未允真宗曰朕業已許之矣尋知開封能檢察隱微京師稱之累遷至右司郎中出知秦州暴疾卒濬與李宗諤同歲同月後一日生其卒也亦後一日衆以爲異

論曰曹彬以器識受知太祖遂膺柄用平居於百蟲之蟄猶不忍傷出使吳越籍上私餽悉用施予而不留一錢則其總戎專征而秋毫無犯不妄戮一人者益可信矣潘美素厚太祖信任於得位之初遂受征伐之託劉鋹遣使乞降觀美所喻辭義嚴正得奉辭伐非之體則

其威名之重豈待平嶺表定江南征太原鎮北門而後見哉二人皆謚武惠皆與配饗兩家子孫皆能樹立享富貴而光獻章懷皆稱賢后非偶然也君子謂仁恕清慎能保功名守法度唯彬爲宋良將第一豈無意哉若李濬者亦以材幹自結主知遂歷清顯謂爲陰德所致理或然也

宋史卷二百五十八終

萬曆二十七年刊

宋史卷二百五十八

列傳

七

開府儀同三司上柱國錄軍國重事尚書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

張美 郭守文 尹崇珂 劉廷讓

袁繼忠 崔彥進 張廷翰 皇甫繼明

張瓊 附

張美字玄珪貝州清河人少善書計初為左藏小吏以
彊幹聞三司薦奏特補本庫專知出為澶州糧料使周

世宗鎮澶淵每有求取美必曲爲供給周祖聞之怒將
譴責之而恐傷世宗意徙美爲濮州馬步軍都虞候世
宗卽位召爲樞密承旨時宰相景範判三司被疾世宗
命美爲右領軍衛大將軍權判三司世宗征淮南留美
爲大內部署一日方假寐忽覺心動遽驚起行視宮城
中少頃內醞署火起既有備卽撲滅之俄真授三司使
四年世宗再幸淮上皆爲大內都點檢北征又爲大內
都部署師還爲左監門衛上將軍充宣徽北院使判三
司美彊力有心計周知其利病每有所條奏釐革上多
可之常以幹辦稱世宗連歲征討糧餽不乏深委賴焉

然以澶淵有所求假頗薄之美亦自愧恭帝嗣位加檢
校太傅宋初加檢校太尉初李筠鎮上黨募亡命多爲
不法漸倔彊難制美度筠必叛陰積粟於懷孟間後筠
果叛太祖親討之大軍十萬出太行經費無闕美有力
焉拜定國軍節度縣官市木關中同州歲出緡錢數十
萬以假民長吏十取其一謂之率分錢歲至數百萬美
獨不取未幾他郡有詣闕訴長吏受率分錢者皆命償
之乾德五年移鎮滄州太平興國初來朝改左驍衛上
將軍美獻都城西河曲澗果園二蔬圃六亭舍六十餘
區八年請老以本官致仕雍熙二年卒年六十八淳化

初諡恭惠子守瑛至供備庫使孫士宗至內殿承制士宗卒士禹爲崇班士安至閣門祇候士宣爲禮殿副使郭守文并州太原人父暉仕漢爲護聖軍使從周祖征河中戰死守文年十四居喪哀毀周祖憐之召隸帳下廣順初補左班殿直再遷東第二班副都知宋初遷西頭供奉官蜀平選知簡州時劔外多寇守文悉招來集附從潘美征嶺南會擒劉鋹遣守文馳傳告捷遷翰林副使從曹彬等平金陵護送李煜歸闕下時煜以拒命頗自歎不欲生見太祖守文察知之因謂煜曰國家止務恢復疆土以致太平豈復有後至之責耶煜心遂安改西京作坊使領翰林司事俄從党進破并寇於團相谷太平興國初秦州內附蕃部騷動命守文乘傳撫諭西夏悅伏三年遷西上閣門使是夏汴水決于寧陵發宋亳丁壯四千五百塞之命守文董其役是冬又與閣門副使王侁西八作副使石全振護塞靈河縣決河及征太原守文與判四方館事梁迥分護行營馬步軍會劉繼元降其弟繼文據代州依遼人之援以拒命遣守文討平之俄受詔護定州屯兵大破遼人於蒲城以功遷東上閣門使領澶州刺史召還擢拜內客省使八年滑州房村河決發卒塞之命守文董其役遼人擾雄州

命守文率禁兵數萬人赴援既至遼人遁去雍熙二年
詔守文率兵屯三交俄加領武州團練使屬夏人擾攘
命守文帥師討之破夏州鹽城鎮岌羅膩等十四族斬
首數千級俘獲生畜萬計又破咩鬼族殲焉諸部畏懼
相率來降凡銀麟夏三州歸附者百二十五族萬六千
餘戶西鄙遂寧五年春大舉北伐爲幽州道行營前軍
步軍水陸都監卒與遼人遇爲流矢所中氣色不撓督
戰益急軍中服其量會大軍不利坐違詔逗遛退軍左
遷右屯衛大將軍事具曹彬傳明年復舊職裁三月拜
宣徽北院使又與田欽祚並爲北面排陣使屯鎮州端
拱初改南院使鎮州路都部署又爲北面行營都部署
兼鎮定高陽關兩路排陣使是冬遼騎南侵大破之唐
河端拱三年十月卒年五十五太宗悼惜之贈侍中諡
忠武追封譙王遣中使護喪歸葬京師守文沈厚有謀
略頗知書每朝退習書百行出言溫雅未嘗忤人意先
是將臣戍邊者多致寇以邀戰功河朔諸州殆無寧歲
旣敗岐溝關乃命守文以內職總兵鎮常山以經略之
守文旣喪月餘中使自北邊來言守文死軍士皆流涕
帝問何以得此對曰守文得奉祿賜資悉犒勞士卒死
之日家無餘財帝嗟嘆久之賜其家錢五百萬爲真宗

納其女爲夫人卽章穆皇后也子崇德至太子中舍崇
信至西京左藏庫使同知皇城司贈福州觀察使崇儼
至崇儀使全州刺史贈潤州觀察使諸司使無廢朝贈
官之例崇信崇儼咸以后兄故特示優禮崇德子承壽
至虞部員外郎天禧五年錄承壽子若水爲太常寺奉
禮郎崇仁爲解州團練使

尹崇珂秦州天水人後徙居大名父延助歷磁同潞三
州刺史崇珂初事周世宗於藩邸以謹厚稱及卽位補
東西班都知從戰高平有勞績遷本班副點檢從征淮
南遷都虞候轉都指揮使改殿前都指揮使宋初出爲

淄州刺史有善政民請闕請刻石頌德太祖命殿中侍
御史李穆撰文賜之討湖南爲行營前軍馬軍都指揮
使荆湘平授朗州團練使又與潘美丁德裕克郴州乾
德中征領表以崇珂爲行營馬步軍副部署克廣州擒
劉鋹卽日詔與潘美同知廣州兼市舶轉運等使錄功
遷保信軍節度未幾南漢開府樂範容州都指揮使鄧
存忠韶州賊帥周思瓊春恩道都指揮使麥漢瓊等據
五州之地以叛崇珂討之太祖遣中使李神祐督戰數
月盡平其黨還治所六年卒年四十二贈侍中遣中使
護其喪歸葬洛陽以其子昭吉弟崇珪並爲西京作坊

使昭吉領會州刺史崇珪領歙州刺史初太宗在周朝娶崇珂妹追諡淑德皇后昭吉至洛死使次子昭輯至供奉官閣門祇候

劉廷讓字光乂其先涿州范陽人曾祖仁恭唐盧龍軍節度祖守文襲滄州盧彥威遂據其城昭宗授以節鉞後其弟守光囚父仁恭守文舉兵討之軍敗爲守光所殺廷讓與其父延進避難南奔少有膂力周祖鎮鄴以隸帳下廣順初補內殿直押班累遷龍捷都校從世宗征淮南以功領雷州刺史再遷涪州團練使領鐵騎右廂宋初轉江州防禦使領龍捷右廂從征李筠爲行營

先鋒使建隆二年改侍衛馬軍都指揮使領江寧軍節度乾德二年春詔領兵赴潞州以備并寇冬興師伐蜀爲四川行營前軍兵馬副都部署率禁兵步騎萬人諸州兵萬人由歸州進討入其境連破松木三會巫山等砦獲蜀將南光海等五千餘人擒戰懼都指揮使袁德宏等千二百人奪戰艦二百餘艘又獲水軍三千人因度南岸斬三千餘級初夔州有鎖江爲浮梁上設敵棚三重夾江列礮具廷讓等將行太祖以地圖示之指鎖江曰我軍至此泝流而上慎勿以舟師爭勝當先以步騎陸行出其不意擊之俟其勢却卽以戰懼夾攻取之

必矣及師至距鑠江三千里舍舟步進先奪其橋復牽舟而上破州城守將高彥儔自焚悉如太祖計遂進克萬施開忠四州峽中郡縣悉下明年正月次遂州州將陳愈率吏民來降盡出府庫金帛以給將士初出師也太祖命之曰所得郡縣當領帑藏爲朕賞戰士國家所取唯土疆爾故人皆効命所至成功蜀平王全斌等皆坐縱部下掠奪子女玉帛及納賄賂左降惟廷讓秋毫無犯及全師雄等作亂郡縣相應寇盜蠡起廷讓又與曹彬破之以功改領鎮安軍節度從征大原開寶六年出爲鎮寧軍節度太平興國二年入爲右驍衛上將軍

太平興國二年曹彬敗於岐溝關諸將失律多坐黜免旣而契丹擾邊時議遣將無愜上意者時廷讓與宋渥張永德並罷節鎮在環列帝欲令擊契丹自效乃遣分守邊郡以廷讓知雄州又徙瀛州兵馬都部署是冬契丹數萬騎來侵廷讓與戰君子館時天大寒兵士弓弩皆不能授契丹圍廷讓數重廷讓先分精兵屬李繼隆爲後殿緩急爲援至是繼隆退保樂壽廷讓一軍皆沒死者數萬人僅以數騎獲免先鋒將賀令圖楊重進皆陷於契丹自是河朔戍兵無鬪志又科鄉民爲兵以守城皆未習戰鬪契丹遂長驅而入陷深祁德數州殺官吏俘

士民所在輦金帛而去博魏之北民尤苦焉太宗聞之下哀痛之詔初廷讓詣闕待罪太宗知爲李繼隆所誤不之責四年復命代張永德知雄州兼兵馬部署是秋以疾聞帝遣內醫診視因上言求歸京師不俟報迺離屯所帝怒下御史按問獄具下詔曰右驍衛上將軍劉廷讓朕以其宿舊存董軍政擢自環尹付之成師俾控邊關式防寇鈔而乃以病爲解不俟報命委棄戎重俶裝上道矧萬旅所集實制於中權列燧相望或虞於外侮事機一失咎責安歸有司議刑當在不赦錄其素效特從寬典可削奪在身官爵配隸商州又黜其子如京

使永德爲濠州團練副使崇儀副使永和爲唐州刺史
廷讓旣黜怏怏不食行至華州卒年五十九帝錄其舊勳贈太師子永德至內殿崇班永恭至西京作坊副使永和爲內殿承制永錫至崇班永保永昌永規並至閤門祇候永崇爲崇班永寧及孫允忠並爲閤門祇候袁繼忠其先振武人後徙并州父進仕周爲階州防禦使繼忠以父任補右班殿直太祖平澤潞討并汾悉預攻戰乾德中征蜀隸大將劉廷讓麾下旣克蜀知雲安軍歷嘉蜀二州監軍開寶中伐廣南爲先鋒壕砦廣南平以功遷供奉官護隰州白壁關屯兵時河東拒命繼

忠累入其境破三砦擒將校二人得生口馬牛羊鎧仗
踰萬計近戍主將懼無功受譴以誠告繼忠繼忠以所
獲分與之遂與都巡檢郭進略地忻代州改天平軍巡
檢太宗卽位以爲閣門祇候令擊梅山洞賊破之又巡
邊部於唐龍鎮太宗征太原繼忠預破鷹陽軍先登
陷陣契丹入代境繼忠率兵擊走之以功遷通事舍人
護高陽關屯兵與崔彥進破契丹長城口殺獲數萬衆
璽書褒美時有勸繼忠自論其功者繼忠不荅會趙保
忠來朝獻其地綏州刺史李克憲偃蹇不奉詔遣繼忠
諭旨竟率克憲入朝遷西上閣門副使詔與田仁朗率
兵定河西諸州大破西人於葭蘆州遷引進副使護定
州屯兵雍熙二年遷西上閣門使三年大將田重進征
契丹命繼忠爲定州路行營馬步軍都監領師取飛狐
下靈丘平蔚州擒其帥大鵬翼以獻事見重進傳師還
繼忠爲後殿行列甚整至定州重進欲斬降卒後期至
者繼忠諭以殺降不祥皆救免之遷判四方館事領播
州刺史護屯兵如故大將李繼隆以易州靜塞騎兵尤
驍果取隸麾下畜其妻子城中繼忠言於繼隆曰此精
卒止可守城萬一敵至城中誰與捍者繼隆不從旣而
契丹入寇城陷卒妻子皆爲所俘繼隆疑此卒怨已欲

分隸諸軍繼忠曰不可但奏升其軍額優以廩給使之盡節可也從之衆皆感悅繼忠因自請以隸麾下會契丹騎大至駐唐河北諸將欲堅壁待之繼忠曰今疆敵在近城中屯重兵不能剪滅令長驅深入侵略他郡雖欲謀自安之計豈折衝禦侮之用乎我將身先士卒死於寇矣辭氣慷慨衆壯之靜塞軍摧鋒先入契丹兵大潰太宗聞之降璽書獎諭賜予甚厚淳化初遷引進使護鎮定高陽關兩路屯兵三年被病召赴闕卒年五十五繼忠長厚忠謹士大夫多與遊前後賜賚鉅萬計悉以犒賞士卒身死之日家無餘財搢紳稱之子用成雍熙初登進士第至太常博士

崔彥進大名人純質有膽畧善騎射漢乾祐中隸周祖帳下廣順初補衛士世宗鎮澶淵令領禁兵以從顯德初爲控鶴指揮使後征淮南以功遷散員都虞候從平瓦橋關改東西班指揮使領昭州刺史宋初改控鶴右廂指揮使領果州團練使征李筠爲先鋒部署以功遷常州防禦使從平李重進改虎捷右廂建隆二年遷侍衛步軍都指揮使領武信軍節度大舉伐蜀爲鳳州路行營前軍副都部署蜀平坐縱部下略王帛子女及諸不法事左遷昭化軍節度觀察留後太祖郊祀西洛彥

進來朝授彰信軍節度太平興國二年移鎮河陽四年正月遣將征太原分命攻城以彥進與郢州防禦使尹勳攻其東彰德軍節度李漢瓊冀州刺史牛思進攻其南棣州觀察使曹翰翰林使杜彥圭攻其西彰信軍節度劉遇光州刺史史珪攻其北彥進督戰甚急太祖嘉之晉陽平從征幽州又與內供奉官江守鈞率兵攻城之西北及班師詔彥進與西上閣門副使薛繼與閣門祇候李守斌領兵屯關南以功加檢校太尉是秋契丹侵遂城彥進與劉廷翰崔翰等擊破之斬首萬級五年車駕北巡以彥進爲關南都部署敗契丹於唐興口雍熙三年正月命將北伐分兵三路詔彥進爲幽州道行營馬步軍水陸副都部署與曹彬交信出雄州大軍失利彥進坐違彬節制別道回軍爲敵所敗召還貶右武衛上將軍事具彬傳四年春授保靜軍節度端拱元年被病召歸闕卒年六十七贈侍中彥進頻立戰功然好聚財貨所至無善政沒後諸子爭家財有司攝治太宗召見爲決之謂左右曰此細務朕不宜親臨但以彥進嘗任節制不欲令其子辱於父耳子懷遵至內殿崇班懷清至崇儀副使懷遵子上賢娶鎮王女崇安縣主懷清子從湜娶岐王女永壽縣主爲西京左藏庫副使後

主卒除名

張廷翰澤州陵川人初爲漢祖親校漢祖入汴補內殿直遷東西班軍使周初改護聖指揮使從世宗平淮甸以功遷鐵騎右第二軍都虞候顯德末改殿前散都頭都虞候宋初權爲鐵騎左第二軍都校領開州刺史從平楊州又以功遷控鶴左廂都指揮使領果州團練使未幾轉龍捷左廂都指揮使領春州團練使乾德中興師伐蜀以廷翰爲歸州路行營馬軍都指揮使隨劉廷讓由歸州路進討師次夔州廷讓頓兵白帝廟西俄而夔州監軍武守謙率所部來拒戰廷翰引兵逆擊敗之於豬頭鋪乘勝拔其城蜀平授侍衛馬步軍都虞候領彰國軍節度開寶二年寢疾太祖親臨問未幾卒年五十三贈侍中

皇甫繼明冀州蓆人父濟汾川令繼明身長七尺善騎射以膂力聞郡中刺史張廷翰以隸左右薦於太祖補殿前指揮使歷左右番押班都知太宗卽位累遷至捧日軍都指揮使領檀州刺史太平興國七年坐秦王廷美事出爲汝州馬步軍都指揮使雍熙三年召入爲馬步軍副都軍頭四年復爲捧日右廂第三軍都指揮使領澶州刺史田重進北征繼明爲前鋒以功加馬步軍

都軍頭端拱二年轉龍神衛四廂都虞候遷嘉州防禦使瓊性暴無機多所凌轍時史珪石漢卿方用事瓊輕侮之目爲巫媼二人銜之切齒發瓊擅乘官馬納李筠隸僕畜部曲百餘人恣作威福禁軍皆懼又誣毀太宗爲殿前都虞候時事建隆四年秋郊禋制下方欲肅靜京師乃召訊瓊瓊不伏太祖怒命擊之漢卿卽奮鉞撻亂下氣垂絕曳出遂下御史案瓊之瓊知不免行至明德門解所繫帶以遺母獄具賜死於城西井亭太祖旋聞家無餘財止有僕三人甚悔之因責漢卿曰汝言瓊有僕百人今何在漢卿曰瓊所者一敵百耳太祖遂優恤其家以其子尚幼乃擢其兄進爲龍捷副指揮使論曰崔彥進與王全斌征蜀黷貨殺降以致蜀亂惟劉廷讓一軍秋毫無犯紀律嚴否於斯別矣尹崇珂斤斤謹厚臨淄攻守之績嶺嶠廓清之勞至於瘁事皇甫繼明力疾以護軍行純誠勇節皆足嘉尚張廷翰西征未覩奇效張美雖稱幹敏而初有自愧之行郭守文敦詩閱禮輕財好施慎保封疆士卒樂用終以勳舊蒙眷聯姻戚里宋初諸將要終而論臧否異趣何昭昭若是哉

宋史卷二百五十九終

宋史卷二百六十

列傳第十九

謝府儀同三司上柱國錄軍國重事前中書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

曹翰

楊信弟嗣贊党進

李漢瓊 劉遇

李懷忠

米信

田重進

劉廷翰 崔翰

曹翰大名人士少為郡小吏好使氣陵人不為鄉里所
乾祐初周太祖鎮鄴與語奇之以隸世宗帳下世宗鎮
澶淵署為牙校入尹開封留翰在鎮會太祖寢疾翰不

侯召歸見世宗密謂曰主上不豫王爲冢嗣不待醫藥而決事於外廷失天下望世宗悟卽入侍以府事屬翰總決及世宗卽位補供奉官從征高平參豫謀畫尋遷樞密承旨護塞決河世宗征淮南留鎧甲千數在正陽旣而得降卒八百部送歸京師時翰適從京師來詣過正陽十數里許遇之慮劫兵器爲叛矯殺之及見世宗具言其事世宗不悅翰曰賊以困歸我非心服也所得器甲盡在正陽苟爲所劫是復生一淮南矣因不之罪從征瓦橋關會班師留知雄州世宗大漸諭范質等以王箸爲相翰爲宣徽使質以箸嗜酒翰飾許而專並寢之改德州刺史宋初從征澤潞還改濟州刺史乾德二年太祖親征西蜀移刺均州澗谷深險翰令鑿石通道師旋以濟詔兼西南諸州轉運使白石門徑趨歸州餉運不乏由夔萬入會王全斌軍成都以平時全師雄擁衆十萬餘據郫縣叛謀窺成都翰率兵會劉光毅曹彬等討平之未幾軍校呂翰殺武懷節據嘉州以叛翰及諸將奪其城謀知賊約三鼓復來攻翰戒知更使緩向晨猶二鼓賊衆不集而潰因而破之劔南遂平師還遷蔡州團練使開寶二年從征太原復爲行營都壕砦使旣班師會河決澶州令翰董其役翰出銀器助役沉所

乘白馬以祭復決陽武再護役皆有成績將征江南命
翰率兵先赴荆南改行營先鋒使進克池州金陵平江
州軍校胡德牙將宋德明據城拒命翰率兵攻之凡五
月而陷屠城無噍類殺兵八百所略金帛以億萬計僞
言欲致廬山東林寺鐵羅漢像五百頭於京師因調巨
艦百艘載所得以歸錄功遷桂州觀察使判潁州太平
興國四年從征太原爲攻城南面都部署與崔彥進李
漢瓊劉遇三節度分部攻城翰攻東北而劉遇攻西北
與劉繼元直城尤險固遇欲與翰易處翰言觀察使班
次下當部東北遇堅欲易之數日不決上慮諸將不協
遣諭翰曰卿智勇無雙西北面非卿不能當也翰乃奉
詔築土山激城中數日而就繼元甚恐軍中乏水城西
十餘里谷中有娘子廟翰往禱之穿渠得水人馬以給
又從征幽州率所部攻城東南隅卒掘土得蟹以獻翰
謂諸將曰蟹水物而陸居失所也且多足彼援將至不
可進拔之象况蟹者解也其班師乎已而果驗五年從
幸大名拜威塞軍節度仍判潁州復命爲幽州行營都
部署詔督役開南河自雄達莫以通漕運議築大隄以
捍之翰遣徒數萬伐巨木於漢境遣騎五授五色旗爲
斥候前遇丘陵水澤寇賊煙火則各舉其旗以爲應又

起烽燧于境上敵疑不敢近塞得巨木數萬以濟用訖
事歸鎮翰在郡歲久征斂苛酷政因以弛上以其有功
每優容之會汝陰令孫崇望詣闕訴翰私市兵器所爲
多不法詔遣御史滕中正乘傳鞠之獄具當棄市上貸
其罪削官爵流錮登州雍熙二年起爲右千牛衛大將
軍分司西京四年召入爲左千牛衛上將軍賜錢五百
萬白金五千兩淳化三年卒年六十九贈太尉上命遷
其四子守謙守能守節守貴官其六子守讓守贇守澄
守恩守英守吉皆補殿直翰陰狡多智數好夸誕貪冒
貨賂飲酒至數斗不亂每奉事上前雖數十條皆默識
不少差嘗作退將詩曰曾因國難披金甲耻爲家貧賣
寶刀翰直禁日因語及之上憫其意故有銀錢之賜咸
平元年賜諡武毅

楊信瀛州人初名義顯德中隸太祖麾下爲裨校宋初
權內外馬步軍副都軍頭建隆二年領賀州刺史改鐵
騎控鶴都指揮使遷殿前都虞候領漢州防禦使乾德
初親郊爲儀仗都部署四年信病瘖上幸其第賜錢二
百萬五年改靜江軍節度開寶二年散指揮都知杜廷
進等將爲不軌謀泄夜啓玄武門召信逮捕遲明十九
人皆獲上親訊而誅之六年遷殿前都指揮使改領建

武軍節度太祖嘗令御龍直習水戰於後池有鼓譟聲
信居玄武門外聞之遽入服皂綈袍以見上謂曰吾教
水戰爾非有他也出上目送之謂左右曰真忠臣也九
年授義成軍節度太平興國二年改鎮寧軍並領殿前
都指揮使三年春以瘍疾在告俄卒贈侍中信雖瘖疾
而質實自將善部分士卒指顧申儆動有紀律故見信
任而終始無疑焉有童奴田王者能揣度其意每上前
奏事及與賓客談論或指揮部下必迴顧王書掌爲字
王因直達其意無失信未死前一日瘖疾忽愈上聞而
駭之遽幸其第信自言遭遇兩朝恩寵隆厚敘謝感慨

涕泗橫集上加慰勉錫賚有差信弟嗣贊嗣建隆初以
信薦爲殿直三遷崇儀副使大山軍監軍雍熙四年就
命知軍事代還以吏民借留再任俄遷高陽關戰擢都
監淳化二年改知保州門無私謁轉運使言其治狀優
遷威虜軍改崇儀使與曹思進同爲靜戎軍保州長城
蒲城緣邊都巡檢使改如京使再知保州有戰功真宗
卽位加洛苑使咸平初領獎州刺史三年與敵人戰於
廉良斬首二千級獲戰馬輜重甚衆以功真拜保州刺
史召還授本州團練使時楊延昭方爲刺史嗣言嘗與
延昭同官驟居其上不可願守舊官上嘉其讓乃遷延

昭官嗣與延昭久居北邊俱以善戰聞時謂之二楊嗣以武人治郡不屑細務又兼領巡徼在郡日少城堞圯壞有未葺者詔供備庫副使趙彬代之改深州團練都巡檢使兼保州鈐轄五年邊人寇保州嗣與楊延昭禦之部伍不整爲所襲士馬多亡失代還特宥其罪明年與防秋之策條陳北面利害以其練達邊事出爲鎮定高陽關三路後陣鈐轄移定州副都部署留其家京師假官第以居景德初改鎮州路副都部署上以嗣耄年總軍政慮有廢闕旋命代之連爲趙貝深三州部署大中祥符五年復出爲天雄軍副都部署六年以左龍武大將軍致仕明年卒年八十一錄其子承憲爲侍禁贊稍知書無異能以兄故得掌禁旅累資朝著至牧守焉党進朔州馬邑人幼給事魏帥杜重威重威愛其淳謹及壯猶令與姬妾雜侍重威敗進以膂力隸軍伍周廣順初補散指揮使累遷鐵騎都虞候宋初轉本軍都校領欽州刺史遷馬步軍副都軍頭領虔州團練使改虎捷右廂都指揮使領睦州防禦使建隆二年改領閩州乾德初改龍捷左廂都虞候領利州觀察使後四年權步軍杜審瓊卒命進代領其務五年領彰信軍節度兼侍衛步軍都指揮使開寶元年將征太原以進將河東

行營前軍開寶二年太祖師臨晉陽置砦四面命進主其東偏師未成列太原驍將楊業領突騎數百來犯進奮身從數人逐業業急入隍中會援兵至緣繯入城獲免上激賞之六年改侍衛馬軍都指揮使領鎮安軍節度九年又命將河東行營兵征太原入其境敗太原軍于城北太祖崩召還太平興國二年出爲忠武軍節度在鎮歲餘一日自外歸有大蛇臥榻上寢衣中進怒烹食之遇疾卒年五十一贈侍中進出戎行形貌魁岸居常恂恂每擐甲胄毛髮皆豎進名進自稱曰暉人間之則曰吾欲從吾便耳先是禁中軍校自都虞候已上悉書所掌兵數於槓上如笏記焉太祖一日問進所掌幾何進不識字但舉槓以示於上曰盡在是矣上以其朴直益厚之嘗受詔巡京師閭里間有畜養禽獸者見必取而縱之罵曰買肉不將供父母反以飼禽獸乎太宗嘗令親吏臂鷹雛于市進亟欲放之吏曰此晉王鷹也進乃戒之曰汝謹養視小民傳以爲笑其變詐又如此杜重威子孫有貧困者進分月俸給之士大夫或有愧焉子崇義開廐使崇貴閤門祇候

李漢瓊河南洛陽人曾祖裕祁州刺史漢瓊體質魁岸有膂力晉末補西班牙衛士遷內殿直周顯德中從征淮

南先登遷龍旗直副都知改左射指揮使宋初再遷鐵
騎第二軍都校領饒州刺史遷控鶴左廂都校領瀘州
刺史改澄州團練使轉虎捷左廂都指揮使領融州防
禦使遷侍衛馬軍都虞候領洮州觀察使王師征江南
命領行營騎軍兼戰權左廂都指揮使自蘄春攻岐口
砦斬首數千級獲樓船數百艘沿流拔池州破銅陵取
當塗作浮梁於牛渚以濟大軍分圍金陵率所部度秦
淮取巨艦實葦其中縱火攻其水砦拔之江南平以功
領振武軍節度太平興國二年出爲彰德軍節度四年
太宗親征太原攻攻城都部署漢瓊與牛思進主攻城
南徧漢瓊先登矢集其腦併中指傷甚猶力疾戰上召
至握欵賜良藥以慰勞之先是攻城者以牛革冒木上
士卒蒙之而進謂之洞子上欲幸其中以勞士卒漢瓊
極諫以爲矢石之下非萬乘之尊所宜輕往上乃止太
原平改鎮州兵馬鈐轄契丹數萬騎寇中山漢瓊與戰
于蒲城大敗之逐至遂城俘斬萬計加檢校太尉車駕
幸大名漢瓊上謁陳邊事稱旨命爲滄州都部署加賜
戰馬金甲寶劔戎具以寵之六年以病還京賜白金萬
兩月餘卒年五十五贈中書令漢瓊性本強使酒難近
然善戰有功無子弟漢贊漢彬太平興國初漢贊補供

奉官嘗監高陽關平戎軍乘傳衝發二州捕劇賊程白
眉數十人悉殲焉累仕崇儀使知寧州大中祥符七年
卒漢彬至禮賓副使

劉遇滄州清池人少魁梧有膂力周祖鎮大名隸帳下
廣順初補控鶴都頭改副指揮使宋初遷御馬直指揮
使俄領漢州刺史改領眉州累遷控鶴右廂都指揮使
領瓊州團練使從征太原以功遷虎捷右廂改領蔚州
防禦使開寶六年轉侍衛步軍都虞候領洮州觀察使
征江南領步軍戰羅都指揮使時吳兵三萬屯皖口遇
會諸路兵破之擒其將朱令贇王暉等獲戎器數萬金

陵以平錄功加領大同軍節度車駕雩祀西洛命率禁
衛以從太平興國二年出爲彰信軍節度四年征太原
與史珪攻城北面平之進攻范陽師還坐所部失律責
授宿州觀察使五年從幸大名復保靜軍節度幽州行
營都部署護築保州威虜靜戎平塞長城五城八年徙
鎮滑州晨興方對客足有炙瘡痛其醫謂火毒不去畋
痛不止遇卽解衣取刀割瘡至骨曰火毒去矣談笑如
常時旬餘乃差遇性淳謹待士有禮尤善射太宗待之
甚厚雍熙二年卒年六十六贈侍中歸葬京師

李懷忠涿州范陽人初名懷義太祖掌禁兵時隸帳下

爲散都頭累遷殿前都指揮使都虞候領開州刺史乾
德中授東西班都指揮使改領富州開寶中從太祖征
晉陽累月未下會盛暑欲班師以休息士卒懷忠謂賊
嬰孤城內無儲峙外無援兵其勢危困若急攻之破在
旦夕臣願奮銳爲士卒先會大熱戰不利懷忠中流矢
力疾戰益奮還授散指揮使遷富州團練使改日騎左
右廂都指揮使上幸西京愛其地形勢得天下中正有
留都之意懷忠乘間進曰東京有汴渠之漕歲致江淮
米數百萬斛禁衛數十萬人仰給於此帑藏重兵皆在
焉根本安固已久一旦遽欲遷徙臣實未見其利上嘉
納之太宗卽位改領本州防禦使稍遷侍衛步軍都虞
候領大同軍節度三年改步軍都指揮使五月卒贈侍
中錄其子紹宗等三人爲供奉官大中祥符三年又錄
其子德鈞爲借職

米信舊名海進本溪族少勇悍以善射聞周祖卽位隸
護聖軍從世宗征高平以功遷龍捷散都頭太祖總禁
兵以信隸麾下得給使左右遂委心焉改名信署牙校
及卽位補殿前指揮使遷直長平揚州日信執弓矢侍
上側有游騎將迫乘輿射之一發而斃遷內殿直指揮
使開寶元年改殿前指揮使領彬州刺史太宗卽位轉

散都頭指揮使繼領高州團練使太平興國三年遷領
洮州觀察使四年征太原命爲行營馬步軍指揮使與
田重進分督行營諸軍并人潛師來犯信擊敗之殺其
將裴正并州平遂移兵攻范陽師還以功擢保順軍節
度使時信族屬多在塞外會其兄子全自朔州奮身來
歸召見俾乘傳詣代州伺間迎致其親屬發勁卒護送
之旣而全宿留踰年邊境斥候嚴竟不能致信慷慨嘆
曰吾聞忠孝不兩立方思以身徇國安能復顧親戚哉
北望號慟戒子姪勿復言五年命與郭守贊等同護定
州屯兵六年秋遷定州駐泊部署八年改領彰化軍節
度使雍熙三年征幽薊命信爲幽州西北道行營馬步
軍都部署敗契丹于新城契丹率衆復來戰王師稍却
信獨以麾下龍衛卒三百禦敵敵圍之數重矢下如雨
信射中數人麾下士多死會暮信持大刀率從騎大呼
殺數十人敵遂小却信以百餘騎突圍得免坐失律議
當死詔特原之責授右屯衛大將軍明年復授彰武軍
節度端拱初詔置方田以信爲邢州兵馬都部署以監
之二年改鎮橫海軍信不知書所爲多暴橫上命何承
矩爲之副以決州事及承矩領護屯田信遂專恣不法
軍人宴犒甚薄嘗私市絹附上計吏稱官物以免關征

上廉知之四年召爲右武衛上將軍明年判左右金吾街仗事未踰月吏卒以無罪被捶撻者甚衆強市人物妻死買地營葬妄發居民冢墓家奴陳贊老病箠之致死爲其家人所告下御史鞫之信具伏獄未上而卒年六十七贈橫海軍節度子繼豐內殿崇班閣門祇候田重進幽州人形質奇偉有武力周顯德中應募爲卒隸太祖麾下從征契丹至陳橋還遷御馬軍使積功至灤州刺史太平興國四年從征太原還錄功擢爲天德軍節度使六年改侍衛步軍指揮使八年改領靜難軍節度使九年河決滑州韓房村重進總護其役以劉吉爲之副河遂塞雍熙中出師北征重進率兵傅飛狐城下用袁繼忠計伏兵飛狐南口擒契丹驍將大鵬翼及其監軍馬贊副將何萬通并渤海軍三十餘人斬首數千級俘獲以萬計逐北四十里連下飛狐靈州等城進攻蔚州其牙校李存璋等殺酋師蕭啜埋執耿紹忠率吏民來附會曹彬之師不利乃命重進董師駐定州遷定州駐泊兵馬都部署三年率師入遼境攻下岐溝關殺守城兵千餘及獲牛馬輜重以還四年春改彰信軍節度淳化三年改真定尹成德軍節度未幾移京兆尹永興軍節度五年改知延州復還鎮至道三年卒年六

十九贈侍中重進不事學太宗居藩邸時愛其忠勇嘗遺以酒炙不受使者曰此晉王賜也何爲不受重進曰爲我謝晉王我知有天子爾卒不受上知其忠朴故終始委遇焉子守信六宅使守吉閣門祇候

劉廷翰開封浚儀人父紹隱後唐末隸兵籍晉天福中以隊長戍魏博范延光反紹隱力戰死焉周世宗鎮澶淵廷翰以膂力隸帳下卽位補殿前指揮使累從征伐以戰功再遷至散指揮第一直都知宋初預平上黨維揚遷鐵騎都指揮使領廉州刺史太宗卽位遷右廂都指揮使領本州團練使遷雲州觀察使太平興國四年

從征太原領鎮州駐泊都鈐轄太宗北伐旣班師上以邊備在於得人乃命廷翰李漢瓊率兵屯真定崔彥進屯關南崔翰屯定州冬契丹果縱兵南侵廷翰先陣於徐河彥進率師出黑蘆堤北銜枚躡契丹後崔翰漢瓊兵繼至合擊之大敗其衆於蒲城廷翰以功領大同軍節度殿前都虞候八年改領彰信軍節度雍熙四年春改鎮滑邢端拱中鎮州駐泊馬步軍都部署郭守文卒上特命廷翰代之淳化三年改大名尹天雄軍節度三年以病求解官還闕上親臨問賜賚有加未幾卒年七十贈侍中廷翰自衛士至上將頗以武勇自任寬厚容

衆雖不事威嚴而長於御下爲殿前都指揮使入朝常
行衆中每歷宮殿門少識之者嘗與郊祀恩當追封三
世廷翰少孤其大父以上皆不逮事忘其家諱上爲撰
名親書賜之子贊元宮苑使登州刺史贊明皇城使勤
州團練使

崔翰字仲文京兆萬年人少有大志風姿偉秀太祖見
而奇之以隸麾下從周世宗征淮南平壽春取關南以
功補軍使宋初遷御馬直副指揮使從征溼潞開寶初
遷河東降民以實陝西地晉人勇悍多習武藝命翰差
擇之及閱試河北鎮兵取其驍果者以分配天武兩軍

九年領端州刺史太宗卽位進本州團練使太平興國
二年秋議武於西郊時殿前都指揮使楊信病瘖命翰
代之翰分布士伍南北綿亘二十里建五色旗號令將
卒望其所舉以爲進退六師周旋如一上御臺臨觀大
悅以藩邸時金帶賜之謂左右曰晉朝之將必無如崔
翰者四年從征太原命總侍衛馬步諸軍率先攻城流
矢中其頰神色不變督戰益急上卽軍帳撫問之太原
平時上將有事幽薊諸將以爲晉陽之役師罷餉置劉
繼元降賞賚且未給遽有平燕之議不敢言翰獨奏曰
所當乘者勢也不可失者時也取之易上謂然定議北

代既而班師命諸將整暇以還至金臺驛大軍南向而潰上令翰率衛兵千餘止之翰請單騎往至則諭以師律衆徐以定不戮一人既復命上喜因命知定州得以便宜從事緣邊諸軍並受節制軍市租儲得以專用冬契丹兵數萬寇蒲城翰會李漢瓊兵於徐河河陽節度崔彥進兵自高陽關繼至因合擊之契丹投西山坑谷中死者不可勝計俘馘數萬所獲他物又十倍焉以功擢武泰軍節度使初劉繼元降上令翰往撫慰俘略無得出城時秦王廷美以數十騎將冒禁出翰呵止之至是構於上明年夏出爲感德軍節度使至鎮時盜賊充

斥翰誘其渠魁戒以禍福羣盜感悟散歸農畝境內肅然雍熙二年移知滑州三年北伐不利上追念徐河之功召翰爲威虜軍行營兵馬都部署四年春改鎮定國軍二年移鎮鎮安軍淳化三年召還以疾留京師稍聞入見上曰臣旣以身許國不願死於家得以馬革裹尸足矣上壯之復令赴鎮月餘卒年六十三贈侍中翰驍勇有謀所至多立功輕財好施死之日家無餘貲晚年酷信釋氏子繼顒虞部員外郎孫承業內殿承制閣門祇候承祐內殿崇班

論曰自曹翰而下嘗任將帥居節鎮者凡十人其初率

由拳勇起家戎行雖不事問學而皆精白一心以立事
功始終匹休而無韓彭之禍者由制御保全之有道也
楊信以薦實重進以忠朴劉遇以淳謹廷翰以武勇稱
故皆終始委遇而不替漢瓊雖木彊使酒米信所爲雖
多暴橫党進恂恂類懷姦詐懷忠論遷似昧大體然以
征太原平江南戰徐河觀之皆不害其爲驍果也至於
好謀善戰輕財好施所至立功則未有優於曹翰崔翰
者也然不可與古之良將同日而語者崔之論奏平燕
未免出於率爾而曹之殺降卒屠江州則又過於忍者
也君子謂功莫優於二子而過亦莫先於二子信矣

宋史卷二百六十終

宋史卷二百六十一

列傳第二十一

開府儀同三司在國錄學國軍事前書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監書事臣黃汝良等奉

勅重校刊

李瓊 郭瓊 陳承昭 李萬超

白重贊 王仁鎬 陳思讓 孫若拙

焦繼勳 子守節 劉重進 袁彥

祁廷訓 張鐸 李萬全 田景咸 王暉附

李瓊字子玉幽州人祖傳正涿州刺史父英涿州從事

萬曆二十七年刊

宋史卷二百六十一

列傳

瓊幼好學涉獵史傳挾策詣太原會唐莊宗屬募勇士
卽應募與周祖等十人約爲兄弟一日會飲瓊熟視周
祖知非常人因舉酒祝曰凡我十人龍蛇混合異日富
貴無相忘苟渝此言神降之罰皆刺臂出血爲誓周祖
與瓊情好尤密嘗造瓊見其危坐讀書因問所讀何書
瓊曰此闡外春秋所謂以正守國以奇用兵較存亡治
亂記賢愚成敗皆在此也周祖令讀之謂瓊曰兄當教
我自是周祖出入常袖以自隨遇暇輒讀每問難瓊謂
瓊爲師及討河中乃解瓊兵籍令叅西征軍事賊平表
於朝後朝散大夫大理司直歲中遷太子洗馬周祖鎮
鄴表爲大名少尹廣順初拜將作監充內作坊使賜金

紫連知亳陝二州改濟州刺史世宗初遷洛州團練使
改安州防禦使治郡寬簡民請立碑頌德詔中書舍人
竇儀撰文賜之宋初召爲太子賓客建隆三年上章請
老改右驍衛上將軍致仕瓊信釋氏明年四月八日詣
佛寺遇疾歸至暮卒年七十三贈太子少師

郭瓊平州盧龍人祖海本州兩治使父令奇盧臺軍使
瓊少以勇力聞事契丹爲蕃漢都指揮使後唐天成中
挈其族來歸明宗以爲亳州團練使改刺商州遷原州
清泰初移階州城壘未葺蜀人屢寇瓊患之因徙城保

險民乃無患受詔攻文州拔二十餘砦生擒數百人晉
天福中移刺警州屬羌渾騷動朔方節度張希崇表瓊
爲部署將兵共討平之連領滑坊虢衛四州開運初爲
北面騎軍排陣使陽城之役戰功居多改沂州刺史充
荊口砦主兼東面行營都虞候擒莫州刺史趙思以獻
改刺懷州俄爲北面先鋒都監契丹陷中原盜賊蠡起
山東爲甚契丹主命瓊復刺沂州以禦盜瓊卽日單騎
赴郡盜聞瓊威名相率遁去漢乾祐中淮人攻密州以
爲行營都部署未至淮人解去會平盧節度劉錡特佐
命之舊解疾不朝將相大臣懼其難制先遣瓊與衛州

刺史郭超以所部兵屯青州錡不自安置酒召瓊代
士幕下欲害瓊瓊知其謀屏去從者從容就席略無懼
色錡不敢發瓊因爲陳禍福錡感其言遂治裝俄詔至
卽日上道瓊改潁州團練使又加防禦使時朗州結荆
淮廣南合兵攻湖南詔瓊以州兵合王令温大軍攻光
州尋以內難不果罷歸朝遣詣河北計度兵甲芻糧周
祖祀南郊召權知宗正卿事世宗征劉崇爲北面行營
都監歷絳蔡齊三州防禦使在齊州民饑瓊以已俸賑
之人懷其惠相率詣闕頌其德政詔許立碑宋建隆三
年告老加右領軍衛上將軍致仕歸洛陽乾德二年卒

年七十二瓊雖起卒伍而所至有惠政尊禮儒士孜孜樂善蓋武臣之賢者也

陳承昭江表人始事李景爲保義軍節度周世宗征淮南景以承昭爲濠泗楚海水陸都應援使世宗旣拔泗州引兵東下命太祖領甲士數千爲先鋒遇承昭於淮上擊敗之追至山陽北太祖親禽承昭以獻世宗釋授右監門衛上將軍賜錦袍銀帶改右領軍衛上將軍分司西京宋初入朝太祖以承昭習知水利督治惠民五丈二河以通漕運都人利之建隆二年河成賜錢二

十萬承昭言其婿王仁表在南唐帝爲致書於李景令

修畿內河堤命承昭董其役又令督諸軍子弟數千鑿池於朱明門外以習水戰從征太原承昭獻計請壅汾水灌城城危甚會班師功不克就乾德五年遷右龍武軍統軍開寶二年卒年七十四贈太子太師中使護喪大中祥符元年錄其孫宗義爲三班借職

李萬超并州太原人幼孤貧負販以養母晉祖起并門萬超應募隸軍籍戰累捷稍遷軍校從李守貞討楊光遠於青州奮勇先登飛石中其腦氣不屬者久之開運中從杜重威拒契丹於陽城流矢貫手萬超拔矢復戰

神色自若以功遷肅銳指揮使契丹入中原時萬超以本部屯潞州主帥張從恩將棄城歸契丹會前驍衛將軍王守恩服喪私第從恩卽委以後事遁去及契丹使至專領郡務守恩遂無所預萬超奮然謂其部下曰我輩垂餌虎口苟延旦夕之命今欲殺使保其城非止逃生亦足建勳業汝曹能乎衆皆躍然喜曰敢不唯命遂率所部大譟入府署殺其使推守恩爲帥列狀以聞漢祖從其請仍命史弘肇統兵先渡河至潞見萬超語之曰得復此州公之力也吾欲殺守恩以公爲帥可乎萬超對曰殺契丹使以推守恩蓋爲社稷計爾今若賊害於人自取其利非宿心也弘肇大奇之表爲先鋒馬步軍都指揮使路經澤州刺史翟令奇堅壁拒命萬超馳至城下諭之曰今契丹北遁天下無主并州劉公仗大義定中土所向風靡後服者族盍早圖之令奇乃開門迎納弘肇卽留萬超權州事漢祖遂以爲刺史及征李守貞以萬超爲行營壕砦使河中平拜懷州刺史周祖開國從征慕容彥超又爲都壕砦使以功授洛州團練使預收秦鳳改萊州從平淮南連移斬登二州所至有善政屬有詔重均田租前牟平令馬陶籍隸文登縣隱苗不通命繫之將斬而後聞陶懼遁去由是境內肅

然宋初入爲右武衛大將軍遷左驍衛大將軍開寶八年卒年七十二

白重贊憲州樓煩人其先沙陁部族重贊少從軍有武勇漢初自散員都虞候三遷護聖都指揮使乾祐中李守貞據河中叛隱帝以重贊爲行營先鋒都指揮使河中平以功領端州刺史周祖轉護聖左廂都指揮使未幾出爲鄭州防禦使改相州留後廣順中授義成軍節度在鎮日河屢決重贊親部丁壯塞大程六合二堤詔書褒美世宗征劉崇以重贊爲河東道行營馬軍都指揮使重贊與李重進居陣西偏樊愛能何徽居陣東偏旣合戰愛能與徽皆遁走惟重贊與重進率所部力戰世宗自督親軍合勢薄之并人大敗旣誅愛能等重贊以功授保大軍節度使及世宗征太原以河陽劉詞爲隨駕都部署命重贊副之其忻州監軍殺刺史趙臯及契丹大將楊耨姑以城降而契丹兵猶盛命重贊及符彥卿擊走之世宗還京改河陽三城節度檢校太尉及征淮南命重贊率親兵三千軍于潁上未幾改淮南道行營馬步軍都虞候俄遷彰義軍節度宋初加檢校太師改鎮涇州有馬步軍教練使李玉本燕人覓狡與重贊有隙遂與部下閻承恕謀害重贊密遣人市馬纓僞

造制書云重贊構逆令夷其族乃自持僞制并馬纓以告都校陳延正曰使者致而去矣延正具白重贊重贊封其書以聞太祖大駭令驗視之率皆誕謬遂命六宅使陳思誨馳赴涇州禽玉及承恕鞫問伏罪棄市延正擢領刺史以賞之仍詔諸州凡被制書有關機密則詳驗印文筆迹俄改秦寧軍節度乾德四年又爲定國軍節度開寶二年改左千牛衛上將軍奉朝請三年卒年六十二

王仁鎬邢州龍岡人後唐明宗鎮邢臺署爲牙校卽位擢爲作坊副使累遷西上閣門使清泰中改右領軍衛將軍晉天福中青州楊光遠將圖不軌以仁鎬爲節度副使伺其動靜歷二年或譖仁鎬于朝改護國軍行軍司馬仁鎬至河中數月光遠反書聞漢乾祐中歷昭義天雄二軍節度副使周祖鎮鄴表仁鎬爲副留守及起兵仁鎬預其謀周祖卽位仁鎬爲王峻所忌出爲唐州刺史遷棣州團練使入爲右衛大將軍充宣徽北院使兼樞密副使顯德初出爲永興軍節度使世宗嗣位移河中會殿中丞上官瓚使河中還言河中民多匿田租遂遣瓚按視均定百姓苦之多逃亡他郡仁鎬抗論其事迺止丁繼母憂去官五年拜安國軍節度制曰眷惟

襄國實卿故鄉分予龍節之權成爾錦衣之美郡民扶老携幼迎於境上有獻錦袍者四仁鎬皆重衣之厚酬以金帛視事翌日省其父祖之墓周視松檟涕泗嗚咽謂所親曰仲由以爲不如負米之樂信矣時人美之郡有羣盜仁鎬遣使遺以束帛諭之悉遁去不復爲盜恭帝嗣位移山南東道節度宋初加檢校太師建隆二年以疾召還次唐州卒於傳舍年六十九仁鎬性端謹儉約崇信釋氏所得俸祿多奉佛飯僧每晨誦佛經五卷或至日盱方出視事從事劉謙責仁鎬曰公貴爲藩侯不能勤恤百姓孜孜事佛何也仁鎬歛容遜謝無愠色當時稱其長者

陳思讓字後已幽州盧龍人父審確仕後唐至晉歷檀順涿均沁唐祁城八州刺史預征蜀權利州節度終金州防禦使思讓初隸莊宗帳下卽位補右班殿直晉天福中轉東頭供奉官再遷作坊使安從進叛於襄陽以思讓爲先鋒右廂都監從武德使焦繼勳領兵進討遇從進之師於唐州花山下急擊大破之從進僅以身免以功領獎州刺史從進平授坊州刺史八年冬契丹謀入寇以思讓監澶州軍賜鞍勒馬器帛討楊光遠於青州也又爲行營右廂兵馬都監兵罷改磁州刺史會符

彥卿北征契丹思議表求預行未幾改衛州連丁內外
艱時武臣罕有執喪禮者思議不俟詔去郡奔喪聞者
嘉之起復隨州刺史漢初移淄州罷任歸朝會淮南與
朗州馬希萼合兵淮南攻湖南馬希廣來乞師旋屬內
難又周祖北征乃分兵令思議往郢州赴援兵未渡而
希廣敗思議留於郢周祖卽位遣供奉官邢思進召思
讓及所部兵還劉崇僭號太原周祖思得方略之士以
備邊遣思議率兵詣磁州控扼澤潞未幾授磁州刺史
充北面兵馬巡檢未行陞磁州爲團練卽以思議充使
廣順元年九月劉崇遣大將李瓌領馬步軍各五都鄉
兵十都自團栢軍於窰子店思議與都監向訓張仁謙
等率龍捷吐渾軍至虎亭西與環軍遇殺三百餘人生
禽百人獲崇偏將王璠曹海金馬五十匹俄遣王峻援
晉州以思議與康延昭分爲左右廂排陣使令率軍自
烏嶺路至絳州與大軍合崇燒營遁去思議又與藥元
福襲之俄命權知絳州明年春遷絳州防禦使顯德元
年九月改亳州防禦使充昭義軍兵馬鈐轄屢敗并人
及契丹援兵遷安國軍節度觀察留後充北面行營馬
步軍排陣使五年敗并軍千餘於西山下斬五百級是
秋邢州官吏耆艾邢銖等四十人詣闕求借留思議詔

褒之十二月改義成軍節度觀察留後六年春世宗將北征命先赴冀州以俟命及得瓦橋關爲雄州命思議讓爲都部署率兵戍守世宗不豫還京留思議讓爲關南兵馬都部署恭帝嗣位授廣海軍節度宋初加檢校太傅乾德二年又爲保信軍節度時皇子興元尹德昭納思議讓女爲夫人開寶二年夏改護國軍節度河中尹七年卒年七十二贈侍中思議累歷方鎮無敗政然酷信釋氏所至多禁屠宰奉祿悉以飯僧人自爲陳佛子身沒之後家無餘財弟思誨至六宅使子欽祚累遷至香藥庫使長州刺史欽祚子若拙

若拙字敏之幼嗜學思議嘗令持書詣晉邸太宗嘉其應對詳雅將廢以軍職若拙懇辭太平興國五年進士甲科解褐將作監丞通判鄂州改太子右贊善大夫知單州以能政 改太常丞遷監察御史充鹽鐵判官益州繫囚甚衆太宗覽奏訝之召若拙面諭委以疏決遷殿中侍御史通判益州淳化三年就命爲西川轉運副使未幾改正使召歸會李至守洛都表若拙佐治改度支員外郎通判西京留司久之柴禹錫鎮涇州復奏爲通判遷司封員外郎部送芻糧至塞外優詔獎之入爲鹽鐵判官轉工部郎中與三司使陳恕不協求徙他局

改主判開拆司車駕北巡命李沆留守東京以若拙爲判官河決鄆州朝議徙城以避水患命若拙與閻承翰往規度尋命權京東轉運使因發卒塞王陵口又於齊州浚導水勢設巨隄於采金山奏免六州所科梢木五百萬民甚便之河平真授轉運使召還拜刑部郎中知潭州時三司使缺若拙自謂得之及是大失望因請對言父母年老不願遠適求納制命上怒謂宰相曰士子操修必須名實相副頗聞若拙有能幹特遷秩委以藩任而貪進擇祿如此往有黃觀者或稱其能選爲西川轉運使輒訴免當時黜守遠郡今若拙復爾亦須譴降凡用人豈以親疎爲間苟能盡瘁奉公有所樹立何患名位之不至也乃追若拙所授告敕黜知處州徙温州代還復授刑部郎中再爲鹽鐵判官改兵部郎中河東轉運使賜金紫會親祀汾陰若拙以所部緡帛芻粟十萬輸河中以助費經度制置使陳堯叟言其幹職擢拜右諫議大夫徙知永興軍府時鄰郡歲饑前政拒其市糴若拙至則許貿易民賴以濟又移知鳳翔府入拜給事中知澶州蝗旱之餘勤于政治郡民列狀乞留天禧二年卒年六十四錄其子映爲奉禮郎若拙多誕妄寡學術當時以第二人及第者爲榜眼若拙素無文故目

爲瞎榜云

焦繼勳字成績許州長社人少讀書有大志嘗謂人曰大丈夫當立功異域取萬戶侯豈能孜孜事筆硯哉遂棄其業游三晉間爲輕俠以飲博爲務晉祖鎮太原繼勳以儒服謁見晉祖與語悅之留帳下天福初授皇城兼宮苑使遷武德使安重榮反鎮州安從進自襄陽舉兵爲應晉祖命繼勳督諸將進討至唐州南遇從進軍萬餘設伏擊敗之禽其牙將安洪義鮑洪等五十餘人得山南東道印從進單騎奔還從進弟從貴率兵千餘人援均州刺史蔡行遇繼勳殺其衆七百生禽百獲從

貴斷腕放入城中從進自此不能復鎮繼勳以功就拜齊州防禦使少帝卽位從進平藉繼勳威名鎮之徙襄陽防禦使歲餘入爲右千牛衛大將軍拜宣徽北院使遷南院使西人寇邊朝議發師致討繼勳抗疏請行拜秦州觀察使兼諸蕃水陸轉運使旣至推恩信設方略招誘諸郡酋長相率奉玉帛牛酒乞盟邊境以安俄徙知陝州就遷保義軍兵馬留後漢初鳳翔軍校陽彥昭據城叛命繼勳率師討之以功授保大軍節度召入會漢祖幸大名留爲京城右廂巡檢使俄改右羽林統軍隱帝末命繼勳領兵北征及周祖舉兵向關繼勳奉隱

帝逆戰于留子陂戰不利遂歸周祖廣順初改右龍武
統軍世宗征淮南爲左廂排陣使又改右羽林統

軍左屯衛上將軍以戰功拜彰武軍節度宋初召爲右
金吾衛上將軍改右武衛上將軍乾德三年權知延州
四年判右街仗杜審瓊卒命繼勳代之時向拱爲西京
留守多飲燕不省府事羣盜白日入都市劫財拱被酒
不出捕逐太祖選繼勳代之月餘京城肅然太祖將幸
洛遣莊宅使王仁珪內供奉官李仁祚部修洛陽宮命
繼勳董其役車駕還嘉其幹力召見褒賞以爲彰德軍
節度仍知留府事仁珪領義州刺史仁祚爲入作副使

繼勳以太平興國三年卒年七十八贈太尉繼勳獵涉
史傳頗達治道所至有善政然性吝嗇多省公府用度
時論少之子守節

守節字秉直初補左璫殿直選爲江淮南路採訪還奏
稱旨擢閣門祇候李順餘黨擾西川命與上官正討平
之高溪州蠻內寇又命往圖方略守節言山川回險非
我師之利詔許招納咸平中置江淮南荆湖路兵馬都
監首被選擢又討施夔州叛蠻以大義諭其酋長皆悔
過內附因爲之畫界定約還遷閣門通事舍人監香藥
權易院三司言歲課增八十餘萬時守節已爲衣庫副

使當遷閣門副使真宗謂輔臣曰守節緣財利羨餘而
遷攢行何以勸邊陲効命者止以爲宮苑副使奉使契
丹館伴丁求說指遠山謂曰此黃龍府也守節應聲曰
燕然山距此幾許求說慙服久之遷皇城副使管勾軍
頭引見司坐以白直假樞密院副承旨尹德潤治第免
所居官三遷東上閣門使加滎州刺史數請補外歷知
襄鄧汝三州遷四方館使以右神武大將軍致仕卒

劉重進幽州人本名晏僧梁末隸軍籍晉初以習契丹
語應募使北邊改右班殿直因賜是名遷西頭供奉官
再使契丹契丹主以其敏慧留爲帳前通事俄南侵署

重進忠武軍節度漢初移鎮鄧州漢法禁牛革甚嚴州
民崔彥陳寶選八人自本鎮持革詣漢祖廟鞭鼓重進
杖遣之判官史在德謂重進不善用法宜置極典及大
理刑部詳覆重進所斷爲是在德坐故入杖死之乾祐
末罷鎮來朝周祖起兵至封丘詔重進與左神武統軍
袁義率兵拒之重進望塵退走周廣順初從征兗州未
幾封薛國公俄召爲右神武統軍累加檢校太師世宗
南征爲右廂排陣使顯德三年世宗聞揚州無備遣宣
祖韓令坤與重進等往襲取之又爲先鋒都部署進克
泰州初楊行密子孫居海陵號永寧宮周師渡淮盡爲

李景所殺重進入其家得玉硯玉杯盤水晶盞碼碯盃翡翠瓶以獻俄命判廬州行府事兼行營都部署敗淮人千餘于州境又敗五百衆于白城湖及世宗再巡吳師潰于紫金山有至東山口者重進殺三千餘衆及下壽州以功授武勝軍節度淮南平改鎮邠州世宗北征爲先鋒都指揮使恭帝卽位封開府宋初進封燕國公建隆二年秋授右羽林統軍乾德五年改左領軍衛上將軍重進徒善譯語無他才能值契丹入中原遂至方鎮及在環衛嘗從幸玉津園太祖召與語旣退謂左右曰觀重進應對不逮常人前朝以爲將帥何足重耶六年卒年七十

袁彥河中河東人少以趨勇應募從事隸奉國營漢乾祐中周祖領軍討李守貞以彥置麾下及鎮鄴以爲部直小將周廣順中世宗在澶淵遷爲親事都校世宗尹京改開封府步直指揮使顯德初授內外步軍都軍頭領泉州刺史未幾改岳州防禦使從征壽州爲城北造竹籠都部署竹籠者以竹數十萬竿圍而相屬上設版屋載甲士數百人以攻其城又命於渦口修橋橋成世宗幸焉因立爲鎮淮軍李繼勳以淮上失律罷軍職命彥爲武信軍節度權侍衛步軍都指揮使又命爲淮南

道行營馬步軍副都指揮使賜衣服金帶鞍勒馬鎧甲
器仗遣赴軍前太祖下滁陽禽皇甫暉姚鳳彥皆有勞
績詔褒之又令率師屯下蔡以逼壽春及劉仁贍降從
世宗攻濠泗又禽南唐將許文績邊鎬等以獻師還真
授步軍都指揮使領彰信軍節度六年春發近畿丁壯
浚五丈河命彥董其役恭帝嗣位移保義軍節度宋初
加檢校太尉是秋來朝改鎮曹州乾德六年爲靜難軍
節度開寶二年移鄆州五年罷鎮歸闕卒年六十六景
德四年特詔錄其孫昭慶爲借職大中祥符八年昭慶
上彥周朝所受告敕有二聖名譚者特遷殿直

祈廷訓本名廷益避太宗舊名改焉河南洛陽人父珪
梁左監門衛大將軍廷訓善書計騎射隸周祖帳下廣
順中歷東西班右蕃行首鐵騎都虞候世宗卽位改夷
西班都指揮使遷內殿直都指揮使繼領蘭睦二州刺
史從征淮南賜以明光細甲令董舟師巡江界吳人伏
兵三江口葭荻中掩擊廷訓廷訓力戰大破之俘馘千
人餘黨遁去江北平以功遷吉州團練使領鐵騎左廂
都指揮使月餘遷嵐州防禦使領龍捷右廂都指揮使
宋初爲安遠軍節度觀察留後是秋改河陽乾德二年
又改彰德軍節度留後俄權知鄧州五年就拜義武軍

節度開寶二年太祖征太原以廷訓爲北面副都部署
太平興國元年來朝二年冬改左領軍衛上將軍五年
坐私販竹木貴鬻入官責本衛大將軍未幾復舊官六
年卒年五十八廷訓形質魁岸無才略臨事多規避時
人目爲所彙馳以其龐大而無所取也

張鐸河朔人少以才武應募隸軍籍漢初爲奉國右第
六軍都指揮使領澧州刺史周祖以樞密使鎮鄴鐸以
所部從行及起兵鐸預焉廣順初鐸爲奉國左廂都指
揮使韓通爲右廂都指揮使俄並兼防禦使鐸領永州
通領睦州會改奉國爲虎捷鐸仍領其職是冬出爲密

州防禦使改亳州三年授鎮國節度使郊祀畢加檢校太
傅世宗初移彰義軍未幾加檢校太尉顯德三年又移
河中尹護國軍節度宋初加檢校太師俄復鎮涇州州
官歲市馬鐸厚增其直而私取之累至十六萬貫及擅
借公帑錢萬餘緡侵用官麩六十四百餅事發召歸京
師本州械繫其子保常及親吏宋習太祖以鐸宿舊釋
不問罷鎮爲左屯衛上將軍奉朝請而已其所盜用仍
蠲除之保常習亦得釋鐸又嘗假晉邸錢百六十萬太
宗卽位詔貫之俄命判左金吾街仗及駕征河東以鐸
爲京城內外都巡檢鄜州刺史高繼充閑廐副使張守

明分爲裏城左右廂巡檢雍熙三年卒年七十二贈太傅子熙載至左千牛衛大將軍熙載子禹珪字天錫粗知書有方略幼事太宗藩邸卽位補東西班承旨改殿直帶御器械以材勇擢居禁衛殿前散祇候都虞候咸平初授內殿直都虞候領恩州刺史三年出爲滁州刺史知洛瀛霸三州並兼兵馬鈐轄徙嵐州西人勒厥麻誘衆叛禹珪率衆討之俘六千餘人獲名馬孳畜甚衆景德初授高陽關行營副都部署契丹旣請和帝思守臣有武幹能鎮靜邊郡者親錄十餘人名付中書禹珪預焉遂知石州徙代州又移澶州頗勤政治以瑞麥

生獄空連詔嘉獎會河堤決溢禹珪率徒塞之宰相王旦使兗州還言其狀優詔褒之就拜洺州團練使尋知廣信軍天禧初復爲高陽關副都部署兼知瀛州明年召還將授四廂之職卒年五十九錄其二子李萬全吐谷渾部人善左右射隸護聖軍爲騎士累遷至本軍都校與田景咸王暉等從周祖入汴號十軍主顯德中爲彰武軍節度宋初加檢校太尉橫海軍節度乾德中代歸太祖數召於苑中宴射萬全無將畧惟挽強弓老而不衰帝亦以此賞之

田景咸王暉皆太原人景咸仕漢爲奉國右廂都校從

周祖入汴爲龍捷左廂都校改安國軍留後俄真拜陞
本軍節度世宗時拜武勝軍節度宋初爲左驍衛上將
軍開寶三年卒景咸性鄙吝務聚斂每使命至惟設肉
一器賓主共食後罷鎮常忽忽不樂妻識其意引景咸
徧閱囊儲景咸方自釋在邢州日使者王班至景咸勸
班酒曰王班請滿飲典客曰是使者姓名也景咸悟曰
我意王班是官爾何不早諭我聞者笑之暉性亦吝嗇
貲甚富而妻子飯蔬糲縱部曲誅求民甚苦之世宗以
先朝功臣知而弗問焉至右神武統軍建隆四年終右
領軍衛上將軍

論曰太祖事漢周同時將校多聯事兵間及分藩立朝
位或相亞宋國建皆折其猛悍不可屈之氣俛首改事
且爲盡力焉楊雄有言御之得其道則狙詐咸作使此
太祖之英武而爲創業之君也歟

宋史卷二百六十一終

宋史卷二百六十二

列傳第二十一

開府儀同三司在國錄軍國軍事前中書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監書院事黃汝良等奉

勅重校刊

李穀

晉居潤

竇貞固

李濤

弟漸孫仲容

王易簡

趙上交

子職

張錫

張鑄

邊歸讜

劉温叟

子燁孫几

劉濤

邊光範

劉載

程羽

李穀字惟珍潁州汝陰人身長八尺容貌魁偉少勇力

萬曆二十七年刊

宋史卷二百六十二

列傳

一

善射以任俠爲事頗爲鄉人所困發憤從學所覽如宿習年二十七舉進士連辟華秦二州從事晉天福中擢監察御史少帝領開封尹以穀爲太常丞充推官晉祖幸鄴少帝居守加穀虞部員外郎仍舊職少帝爲廣晉尹穀又爲府推官及卽位拜職方郎中俄充度支判官轉吏部郎中罷職天福九年春少帝親征契丹詔許扈從充樞密直學士加給事中爲馮玉李彥韜所排會帝再幸河北改三司副使權判留司三司事開運二年秋出爲磁州刺史北面水陸轉運使契丹入汴少帝蒙塵而北舊臣無敢候謁者穀獨拜迎於路君臣相對泣下穀曰臣無狀負陛下因傾囊以獻會契丹主發使至州穀禽斬之密送欵於漢祖潛遣河朔曾豪梁暉入據安陽契丹主患之卽議北旋會有告契丹以城中虛弱者契丹還攻安陽陷其城穀自郡候契丹遂見獲契丹主先設刑具謂之曰爾何背我歸太原穀曰無之契丹主因引手車中似取所獲文字而穀知其詐因請曰如實有此事乞顯示之契丹國制人未伏者不卽寘死自後凡詰穀者六次穀詞不屈契丹主病且曰我南行時人云爾謂我必不得北還爾何術知之今我疾甚如能救我則致爾富貴穀曰實無術蓋爲人所陷耳穀氣色不

撓卒寬之俄而德光道殂永康繼立署穀給事中時契丹將麻荅守真定而李崧和凝與家屬皆在城中會李筠何福進率兵逐麻荅推護聖指揮使白再榮權知留後再榮利崧等家財令甲士圍其居以求賂既得之復欲殺崧等滅口穀遽見再榮謂之曰今國亡主辱公輩握勁兵不能死節雖逐一契丹將城中戰死者數千人非獨公之力也一朝殺宰相即日中原有主責公以專殺其將何辭以對再榮甚懼崧等獲免漢初入拜左散騎常侍舊制罷外郡歸本官至是進秩獎之也俄權判開封府時京畿多盜中牟尤甚穀誘邑人發其巢穴有

劉德輿者梁時屢攝畿佐居中牟素有幹材穀卽署攝

本邑主簿浹旬穀請侍衛兵數千佐德輿悉禽賊黨其魁一卽縣佐史一御史臺吏搜其家得金玉財貨甚衆自是行者無患俄遷工部侍郎周祖西征爲西南面行營水陸轉運使關右平改陳州刺史會有內難急召赴闕周祖兵入汴命權判三司廣順初加戶部侍郎未幾拜中書侍郎平章事仍判三司初漢乾祐中周祖討河中穀掌轉運時周祖已有人望屬漢政紊亂潛貯異志屢以諷穀穀但對以人臣當盡節奉上而已故開國之初倚以爲相是歲淮陽吏民數千詣闕請立生祠許之

穀懇讓得止先是禁牛革法甚峻犯者抵死穀乃校每歲用革之數凡田十頃歲出一革餘聽民私用又奏罷屯田務以民隸州縣課役盡除宿弊穀父祖本居河南洛陽經巢之亂園廬蕩盡穀生於外旣貴訪得舊地建蘭若又立垣屋凡族人之不可仕者分田居之詔改清風鄉高陽里爲賢相鄉勳德里二年晨起仆階下傷右臂在告旬中三上表辭相位周祖不允免朝參視事本司賜白藤肩輿召至便殿勉諭穀不得已起視事征兗州爲東京留守判開封府事顯德初加右僕射集賢殿大學士從世宗征太原遇賊於高平匿山谷中信宿而出追及乘輿世宗慰撫之世宗將趨太原命穀先調兵食又代符彥卿判太原行府事師還進位司空門下侍郎監修國史穀以史氏所述本於起居注喪亂以來遂廢其職上言請令端明樞密直學士編記言動爲內廷日曆以付史官是歲河大決齊鄆發十數州丁壯塞之命穀領護刻期就功二年冬議伐南唐以穀爲淮南道行營前軍都部署兼知廬壽等州行府事忠武軍節度王彥副之韓令坤以下十二將率從穀領兵自正陽渡淮先鋒都將白延遇敗吳軍數千于來遠又破千餘人于山口鎮進攻上窰又敗十餘衆獲其小校數十人長

圍壽春南唐遣大將劉彥貞來援穀召將佐謀曰今援軍已過來遠距壽陽二百里舟楫將及正陽我師無水戰之備萬一斷橋梁隔絕王師則腹背受敵矣不如退守浮梁以侍戎輅之至初世宗至圍鎮已聞此謀亟走內侍乘驛止之穀已退保正陽仍焚芻糧回軍之際遞相掠奪淮北役夫數百悉陷于壽春世宗聞之怒亟命李重進率師伐之以穀判壽州行府是秋詔歸闕得風痺疾告滿百日累表請致仕優詔不允每軍國大事令中使就第問之四年春吳人壁紫金山築甬道以援壽春不及留數年師老無功時請罷兵爲便世宗令范質

王溥就穀謀之穀手疏請親征有必勝之利者三世宗大悅用其策及淮南平賞賜甚厚出穀疏令翰林學士承旨陶穀爲贊以賜之是夏世宗還穀扶疾見便殿詔令不拜命坐御坐側以抱疾旣久請辭相位世宗怡然勉之謂曰譬如家有四子一人有疾棄而不養非父之道也朕君臨萬方卿處輔相之位君臣之間分義斯在柰何以祿奉爲言穀愧謝而退俄以平壽州敘功加爵邑是秋穀抗表乞骸骨罷相守司空加邑封令每月肩輿一詣便殿訪以政事五年夏世宗平淮南回賜穀錢百萬米麥五百斛芻粟薪炭等恭帝卽位加開府儀同

三司進封趙國公求歸洛邑賜錢三十萬從其請太祖
卽位遣使就賜器幣建隆元年卒年五十八太祖聞之
震悼贈侍中穀爲人厚重剛毅深沉有城府雅善談論
議政事能近取譬言多詣理辭氣明暢人主爲之聳聽
人有難必救有恩必報好汲引寒士多至顯位與韓熙
載善熙載將南渡密告穀曰若江東相我我當長驅以
定中原穀笑曰若中原相我下江南探囊中物耳穀後
果如其言李昉嘗爲穀記室在淮上被病求先歸穀視
之曰子他日官祿當如我昉後至宰相司空周顯德中
扈載以文章馳名樞密使王朴薦令知制誥除書未下
朴詣中書言之穀曰斯人命薄慮不克享耳朴曰公在
衡石之地當以材進人何得言命而遺才載遂知制誥
遷翰林學士未幾卒世謂朴能薦士穀能知人穀歸洛
中昭義李筠以穀周朝名相遺錢五十萬他物稱是穀
受之旣而筠叛穀憂恚而終子吉至補闕拱至太子中
允

咎居潤博州高唐人善書計後唐長興中隸樞密院爲
小吏以謹愿稱晉初出掌滑州廩庾遂補牙職會景延
廣留守西洛署爲右職延廣卒居潤往依陝帥白文珂
文珂致仕乃表薦居潤於周祖時世宗尹京詔以補府

中夏職卽位擢爲軍器庫使從征高平以功遷客省使
知青州從向拱西征爲行營都監秦鳳平以居潤爲秦
州歷知鳳陽河中府顯德三年秩遷內客省使代王朴
知開封府四年再幸壽州命爲副留守十月幸淮上以
居潤爲宣徽北院使兼副留守五年夏南征還復判開
封府六年征關南爲東京副留守及吳廷祚出塞河命
居潤權知開封府事廷祚爲樞密使真判開封府改左
領軍衛上將軍恭帝嗣位加檢校太傅太祖立加檢校
太尉及征澤潞命赴澶州巡警師還權知鎮州加左領
軍衛上將軍建隆二年又權知澶州八月拜義武軍節

度在鎮數年得風痺詔還京師乾德四年卒年五十九
贈太師居潤性明敏有節槩薦於行義初晉室將亡景
廷廣委其族自洛赴難至則爲遼人所執遼人在洛者
遽欲恣標掠廷廣僚吏部曲悉追獨居潤力保護其家
以安居潤與太祖同事世宗情好欵浹嘗薦沈倫於太
祖以爲純謹可用後至宰相世稱其知人子惟質至內
園使弟居濟至水部員外郎大中祥符三年錄其孫建
中爲三班借職

竇貞固字體仁同州白水人父專後唐左諫議大夫貞
固初能屬文同光中舉進士補萬全主簿丁內艱去官

服除授河東節度推官時晉祖在藩以貞固廉介甚重
之及卽位擢爲戶部員外郎翰林學士就拜中書舍人
天福三年詔百僚各上封事貞固疏曰臣聞舉善爲明
知人則哲聖君在位數澤豈有隱淪昭代用材政理固
無紊亂求賢若渴從諫如流鄭所以譽子皮闕

魯所以譏文仲爲國之要進賢是先陛下方
樹丕基宜求多士乞降詔百僚令各司議定一人有何
能識堪何職官朝廷依奏用之若能符薦引果謂當才
所奏之官望加獎賞如乖其舉或涉徇私所奏之官宜
加黜罰自然官由德序位以才升三人同行尚聞擇善

十日所視必不濫知臣職在論思敢陳狂狷書奏帝深
嘉之命所司著爲令典明年改御史中丞與太常卿崔
稅刑部侍郎呂琦禮部侍郎張允同詳定正冬朝會禮
節樂章及二舞行列歷刑部門下二侍郎少帝卽位拜
工部尚書遷禮部尚書知貢舉舊制進士夜試繼以三
燭長興二年改令晝試貞固以晝晷短難盡士材奏復
夜試擇士平允時論稱之改刑部尚書出爲潁州團練
使歲餘復拜刑部尚書漢祖入汴貞固與禮部尚書王
松率百官見于滎陽西漢祖駐馬勞問久之初營宗廟
帝以姓自漢出遂襲國號尊光武爲始祖并親廟爲五

詔羣臣議貞固上言曰按王制天子七廟諸侯五大夫三士一正義曰周之制七廟者太祖及文王武王之祧與親廟四也又曰七廟者據周也有其人則七無其人則五至光武中興及魏晉宋齊隋唐或立六廟或立四廟蓋建國之始未盈其數也禮曰德厚者流光此天子可以祀六世之義也今陛下大定寰區重興漢祚旁求典禮用正宗祧伏請立高曾祖禰四親廟及自古聖王祖有功宗有德更立始祖在四廟之外不拘定數所以或五廟或七廟今請尊高皇帝光武皇帝爲始祖法文王武王不遷之制用歷代六廟之規庶合典禮漢祖從之論者以天子建國各從其所起堯自唐侯禹生大夏是也立廟皆祖其有功商之契周之后稷魏之武帝晉之三廟是也高祖起於晉陽而追嗣兩漢徒以同姓爲遠祖甚非其義貞固又以四親匹庶上合高光失之彌遠矣但援立親廟可也餘皆非禮俄遷吏部尚書初帝與貞固同事晉祖甚相得時蘇逢吉蘇禹珪自霸府僚佐驟居相位思得舊臣冠首以貞固持重寡言有時望乃拜司空門下侍郎平章事弘文館大學士貞固少時中蠱若贅在喉中常鯁閥及爲相日因大吐有物狀蜥蜴落銀盤中毒氣衝盤焚於中衢臭聞百步外人皆異

之隱帝卽位加司徒改本貫永安鄉爲賢相鄉班瑞里
爲勳貴里楊邠史弘肇王章樹黨恣橫專權凌上貞固
但端莊自持不能規救周祖兵起貞固與蘇逢吉奉隱
帝兵次于野敗逢吉倉黃自殺貞固遂詣周祖周祖稱
太后制委貞固與蘇禹珪王峻同掌軍國政事周祖登
位加兼侍中會以馮道爲首相改監修國史俄罷相守
司徒封沂國公世宗卽位以范質爲司徒貞固遂歸洛
陽輸課役齒爲編民貞固不能堪愬於留守向拱拱不
聽宋初以前三公赴闕卽位詣范質求任東宮三少預
朝請質不爲奏乃還洛放曠山水與布衣輩携妓載酒

以自適開寶二年病困自爲墓誌卒年七十八

李壽字信臣京兆萬年人唐敬宗子郇王瑋十世孫祚
鎮臨濮令父元將作監朱梁革命元以宗室懼禍挈壽
避地湖南依馬殷署壽衡陽令壽從父兄郁仕梁爲閤
門使上言壽父子旅湖湘詔殷遣歸京師補河陽令後
唐天成初舉進士甲科自晉州從事拜監察御史遷右
補闕宋王從厚鎮鄴以壽爲魏博觀察判官歲餘入爲
起居舍人晉天福初改考功員外郎史館修撰晉祖幸
大梁張從賞以盟津叛陷洛陽扼虎牢故齊王全義子
張繼祚者實黨之晉祖將族其家壽上疏曰全義歷事

累朝頗著功效當巢蔡之亂京師爲墟全義手披荆棘再造都邑垂五十年洛民賴之乞以全義之故止罪繼祚妻子從之嘗奉詔爲宋州括田使前雄州刺史袁正辭齋束帛遺濤以田園爲託濤表其事晉祖嘉之正辭坐降一階濤遷浚儀令改比部郎中鹽判官改刑部郎中涇帥張彥澤殺記室張式奪其妻式家人詣闕上訴晉祖以彥澤有軍功釋其罪濤伏閣抗疏請寘於法晉祖召見諭之濤植笏叩階聲色俱厲晉祖怒叱之濤執笏如初晉祖曰吾與彥澤有誓約恕其死濤厲聲曰彥澤私誓陛下不忍食其言范延光嘗賜鐵券今復安在晉祖不能荅卽拂衣起濤隨之諫不已晉祖不得已召式父鐸弟守貞子希範等皆拜以官罷彥澤節制濤歸洛下賦詩自悼有三諫不從歸去來之句先是范延光據鄴叛晉祖賜鐵券許以不死終亦不免故濤引之晉祖崩濤坐不赴臨停未幾起爲洛陽令遷屯田職方郎中中書舍人會契丹入汴彥澤領突騎入京城恣行殺害人皆爲濤危之濤詣其帳通刺謁見彥澤曰舍人懼乎濤曰今日之懼亦猶足下昔年之懼也向使先皇聽僕言寧有今日之事彥澤大笑命酒對酌濤神氣自若漢祖起義至洛濤自汴奉百官表入對漢祖問京師財

賦從契丹去後所存幾何濤具對稱旨漢祖嘉之至汴以爲翰林學士杜重威據鄴叛高祖命高行周慕容彥超討之二師不協濤密疏請親征高祖覽奏以濤堪任宰輔卽拜中書侍郎兼戶部尚書平章事隱帝卽位楊邠周祖共掌機密史弘肇握兵柄與武德使李鄴等中外爭權互作威福濤疏請出邠等藩鎮以清朝政隱帝不能決白于太后太后召邠等諭之反爲所構免相歸第時中書厨釜鳴者數四濤晝寢閣中夢嚴飾廳事羣吏趨走云迎新宰相帶諸司使旣寤心異之數日濤罷以邠爲相兼樞密使及周祖舉兵太后倉皇涕泣曰不用李濤之言宜其亡也周初起爲太子賓客歷刑部戶部二尚書世宗晏駕爲山陵副使恭帝卽位封莒國公宋初拜兵部尚書建隆二年濤被病有軍校尹勳董浚五丈河陳留丁壯夜潰勳擅斬隊長陳琲等十人丁夫七十人皆杖一百刖其左耳濤聞之力疾草奏請斬勳以謝百姓家人謂濤曰公久病宜自愛養朝廷事且置之濤憤言曰人孰無死但我爲兵部尚書坐視軍校無辜殺人烏得不奏太祖覽奏嘉之詔削奪勳官爵配隸許州濤卒年六十四贈右僕射濤慷慨有大志以經綸爲已任工爲詩筆札道媚性滑稽善諧謔亦未嘗忤物

居家以孝友聞景德三年其孫惟勤詣闕自陳詔授許州司士叅軍子承休至尚書水部郎中承休子仲容濤弟澣字日新幼聰敏慕王楊盧駱爲文章後唐長興初吳越王錢鏐卒詔兵部侍郎楊凝式撰神道碑令澣代草凡萬餘言文彩適麗時輩稱之秦王從榮召至幕中從榮敗勒歸田里久之起爲校書郎集賢校理晉天福中拜右拾遺俄召爲翰林學士會廢學士院出爲吏部員外郎遷禮部郎中知制誥復置翰林遷中書舍人再爲學士時濤在西掖縉紳榮之契丹入汴澣與同職徐台符俱陷塞北永康王兀欲襲位置澣宣政學士殿兀欲死述律立以其妻族蕭海貞爲幽州節度使海貞與澣相善澣乘間諷海貞以南歸之計海貞納之周廣順二年澣因定州孫方諫密表言契丹衰微之勢周祖嘉焉遣謀者田重霸賫詔慰撫仍命澣通信澣復表述契丹主幼弱多寵好擊鞠大臣離貳若出師討伐因與通好乃其時也請速行之屬中原多事不能用其言澣在契丹嘗逃歸爲其所獲防禦彌謹契丹應曆十二年六月卒時建隆三年也濤收澣文章編之爲丁年集澣二子承確主客郎中承績職方郎中仲容字儀父舉進士甲科除大理評事知三原縣累擢

監察御史爲殿試進士考官真宗問題義對稱旨詔試
中書擢左司諫直史館天聖中以起居郎爲知制誥累
遷右諫議大夫在西掖八年次當補學士而不爲宰相
張士遜所喜罷爲給事中集賢院學士判史館司農寺
復知制誥及石中立張觀補學士始以爲翰林侍讀學
士久之兼龍圖閣學士至戶部侍郎卒仲容性醇易喜
飲酒不與物忤與人言未嘗及勢利三弟早卒字其諸
孤十餘人如巳子當世稱其長者然於吏事非所長自
集制草爲冠鳳集十二卷

王易簡字國寶京兆萬年人性介特寡合曾祖肫唐劔

州刺史祖遠連州刺史父貫唐州刺史易簡少好學工
詩會僖宗幸蜀長安兵亂避地山谷梁乾化中邵王友
誨鎮陝易簡舉進士詣府拔解友誨贈錢二十萬明年
遂擢第復隱華山邠帥韓恭辟觀察支使府罷華帥李
保衡復辟從事踰年尹皓代保衡易簡仍在幙府會朱
友謙以河中叛歸莊宗攻華州甚急城中危懼咸請築
月城以自固皓恃勇不聽下令曰有敢復言者斬易簡
固請迺許板築始畢外城果壞軍民賴之會夜不能攻
友謙遂遁去皓卒易簡歸田里久之召爲著作郎數月
棄去復召爲右拾遺上書忤旨出爲鄧州節度推官後

唐同光中遣魏王繼岌伐蜀以宰相郭崇韜爲招討使
辟易簡爲巡官改魏王都督府記室參軍明宗卽位周
帥羅周恭辟爲掌書記府罷退居華陰作小隱詩二十
首并序以見志好事者多傳誦秦王從榮聞而重之謂
宰相馮道李愚曰易簡有才豈宜久居外地卽召爲祠
部員外郎改水部郎中知制誥府中書舍人晉初賜金
紫判弘文館史館事晉祖爲治務求速效易簡上漸治
論以諫之詔書褒荅以論付史館及廢翰林學士易簡
兼知內制三拜御史中丞歷右丞吏部侍郎左丞判吏
部銓嘗上言選門格敕條件具存藩府官僚習熟者少

凡給文解未曉規程以致選人詣都親求解樣往來跋
踈重可傷閔傳寫少差旋復驗放乞自今委南曹詳定
解樣兼錄長定格取解條下諸州板置州院門每取解
時準條式遵行從之晉祖在大梁臺省湫隘易簡奏舉
故事一歲得元省錢二百萬繕治省署及造器物號爲
舉職周朝諱簡易止名易廣順初遷禮部尚書是冬合
三銓爲一令易簡權判俄改刑部尚書周祖將親郊命
判兵部會冊四廟命爲副使周祖晏駕爲山陵副使顯
德四年告老以太子少保致仕歸鄉里宋初召加少傅
所居華陰構一鳴堂二品樓優游自適建隆四年四月

無疾卒年七十九子景讓進士及第至尚書郎

趙上交涿州范陽人本名遠字上交避漢祖諱遂以字稱祖光鄴鄂州錄事參軍父簡章涿州司馬上交身長七尺黑色美風儀善談論負才任氣爲鄉里所推後唐同光中嘗詣中山于王都有和少微者亦在都門下忌之頗毀訾上交都遂不爲禮上交不得志因南游洛陽與中官驃騎大將軍馬紹宏善紹宏領北面轉運制置大使表爲判官遷殿中丞秦王從榮開府兼判軍衛以上交爲虞部員外郎充六軍諸衛推官李瀚張沆魚崇遠皆曰闕秦府悉與上交友善累遷司封郎中充判官從榮素豪邁不遵禮法好昵羣小上交從容言曰王位尊嚴當修令德以慰民望王忍爲此獨不見恭世子戾太子之事乎從榮怒出之歷涇秦二鎮州節度判官從榮及禍僚屬皆坐斥上交由是知名晉初召爲左司郎中度支判官歷右諫議大夫會廢翰林學士以上交爲中書舍人知內外制遷刑部侍郎嘗上言伏覩長興中詔書州縣官在任詳讞刑獄昭雪人命者不限歲月赴選許令超資注官仍賜章服諸道州府給付公驗躬赴行部投狀隨給優牒庶絕欺罔以存激勸載詳元詔止言州縣未該內外職司乞自今但能雪活冤獄不限

中外官並加旌賞諸道州縣委長吏抄案以聞俟本人
考滿卽詣刑部投狀毋得隔越年歲庶使內外同律詔
從之俄遷戶部侍郎拜御史中丞彈舉無所阿避契丹
入汴立明宗幼子許王從益爲帝以禮部尚書王崧爲
左丞相上交爲右丞相契丹去上交請去僞號稱梁王
漢祖將至從益遣上交馳表獻欵授檢校禮部尚書太
僕卿遷祕書監周祖監國命太師馮道迎湘陰公于徐
州以上交副之廣順初拜禮部侍郎會將試貢士上交
申明條制頗爲精密始復糊名考校擢扈載甲科及取
梁周翰董淳之流時稱得士轉戶部侍郎明年再知舉

謗議紛然時樞密使王峻用事常薦童子上交拒之峻

怒奏上交選士失實貶商州司馬朝議以爲太重會峻
貶乃止但坐所取士李觀侯燦賦落韻改太子詹事顯
德初遷賓客二年拜吏部侍郎多請告不朝時出游別
墅世宗因問陶穀曰上交豈衰老乎穀對曰上交昔掌
貢舉放鬻市家子李觀及第受所獻名園多植花卉優
游自適世宗怒免其官未初起爲尚書右丞建隆二年
正月卒年六十七上交所蒞官以幹聞當時稱有公輔
器尤好吟詠有集二十卷張昭爲序子曦字可畏七歲
喪母過哀十二能屬文與兄駿同舉進士未成名而兄

天遂以蔭補千牛備身歷祕書郎殿中丞著作郎卒年
二十六有集十卷太宗嘗取以入內

張錫福州閩縣人梁末劉君鐸任棣州刺史辟爲軍事
判官棣爲鄆之屬郡郡有麴務鄆以牙將主之頗橫恣
民有犯麴三斤牙將欲寘于死君鐸力不能救旣而牙
將盜麥百斛私造麴事覺錫判曰麴犯三斤求生不克
麥盜百斛免死誠難時郡吏以使府牙將乞免錫不允
固寘于法同光末趙在禮舉兵於鄴瀕河諸州多構亂
錫權知州事卽出省錢賞軍皆大悅一郡獨全棣人賴
之後爲淄川令不畏強禦專務愛民刺史有所徵不答
由是銜之及代白其事於宰相馮道道知錫介直卽奏
召爲監察御史出爲陝虢觀察判官晉開運二年拜右
補闕歷起居郎刑部員外郎開封府判官浚儀令司門
駕部二郎中並以清節聞周顯德中以老疾求解官授
右諫議大夫致政宋初改給事中錫無子宰相范質嘗
兄事之館於別墅錫以執政之門不欲久處往依鄉人
鄧州觀察判官黃保緒建隆二年六月卒于穰下

張鑄字司化河南洛陽人性清介不事生產曾祖居卿
祖楊父文蔚在唐俱舉進士楊至翰林學士承旨天平
軍節度檢校吏部尚書文蔚中書侍郎平章事五代史

有傳鑄梁貞明三年舉進士補福昌衛集賢校理拜監
察御史遷殿侍御史仕後唐歷起居郎金部員外郎賜
緋改右司員外郎明宗初轉金部郎中賜金紫嘗上言
曰國家以務農爲本守令以勸課爲先廣闢田疇用實
倉廩竊見所在鄉村浮戶方事墾闢甫成生計種田未
至二頃植木未及十年縣司以定色役民畏責斂捨之
而去殊乖撫恤之方徒設招携之令望令諸州應有荒
田縱民墾蒔俟及五頃已上三年外始聽差科從之使
兩浙還遷考功郎中晉天福初福州王延義奉義稱藩
遣鑄持節冊爲閩國王少帝卽位改河南令開運二年
召爲太常少卿避曾祖諱不拜改祕書少監判太常寺
事踰年轉右庶子分司西京周廣順初入爲左諫議大
夫給事中使朗州顯德三年授檢校禮部尚書光祿卿
又以祖名請避改祕書監判光祿寺宋初加檢校刑部
尚書建隆四年卒年七十二鑄美姿儀善筆札老能燈
下細書如蠅頭由晉以來天地宗廟及上徽號封拜王
公冊文皆詔鑄書之及卒身無兼衣家人鬻其服馬園
圃得錢十萬以葬

邊歸讜字安正幽州薊人父退思檀州刺史歸讜弱冠
以儒學名後唐末客游并邠晉祖鎮太原召置門下表

爲河東節度推官試祕書省校書郎改太原府推官試
大理評事天福初拜監察御史歷殿中侍御史禮部員
外郎充戶部判官遷水部郎中賜金紫拜比部郎中知
制誥歷右諫議大夫給事中嘗上言使臣經過州縣券
料外妄自徵需以豐廉從多索人驢用遞行李挾命爲
勢凌下作威供億稍遲卽加鞭箠吏民受辱寧免怨嗟
欲望察訪得情嚴示懲戒從之俄遷右散騎常侍漢初
歷禮部刑部二侍郎時史弘肇怙權專殺閭里告訐成
風歸讜言曰邇來有匿名書及言風聞事構害善良有
傷風化遂使貪吏得以報復私怨讒夫得以肆其虛語
請明行條制禁遏誣罔凡顯有被論具陳姓名其匿名
書及風聞事者並禁止絕論者躉之周廣順初遷兵部
戶部二侍郎世宗聞其亮直擢爲尚書右丞樞密直學
士以備顧問就轉左丞世宗以累朝以來憲綱不振命
爲御史中丞歸讜雖號廉直而性剛介言多忤物顯德
三年冬大宴廣德殿歸讜酒酣楊袂言曰至於一栻而
已世宗命黃門扶出之歸讜回顧曰陛下何不決殺趙
守微守微者本村民因獻策擢拾遺有妻復娶又言
涉指斥坐決杖配流故歸讜語及之翌日伏閣請罪詔
釋之仍於閣門復飲數爵以愧其心五年秋歸讜與百

官班廣德殿門外忽厲聲聞於帝詔奪一季奉宋初遷
刑部尚書建隆三年告老拜戶部尚書致仕乾德二年
卒年五十七子定雍熙二年進士及第

劉溫叟字永齡河南洛陽人性重厚方正動遵禮法唐
武德功臣政會之後叔祖崇望相昭宗父岳後唐太常
卿溫叟七歲能屬文善楷隸岳時退居洛中語家人曰
吾兒風骨秀異所未知者壽耳今世難未息得與老夫
皆爲溫洛之叟足矣故名之溫叟以蔭補國子四門助
教河南府文學清泰中爲左拾遺內供奉以母老乞歸
就養改監察御史分司時臺署廢弛溫叟作新之未幾

召爲右補闕晉初王松權知青州表爲判官加朝散階
入爲主客員外郎少帝領開封尹奏爲巡官命典文翰
又改廣晉府巡官少帝卽位拜刑部郎中賜金紫改都
官郎中充翰林學士初岳仕後唐嘗居內署至是溫叟
復居斯任時人榮之溫叟旣受命歸爲母壽候立堂下
須臾聞樂聲兩青衣舉箱出庭奉紫袍兼衣母命捲簾
見溫叟曰此卽爾父在禁中日內庫所賜者溫叟拜受
泣下退開影堂列祭以文告之母感愴累日不忍見溫
叟歲滿加知制誥契丹入汴溫叟懼隨契丹北遷與承
旨張允共上表求解職契丹主怒欲出允等爲縣令趙

延壽曰若學士才不稱職求解者守本官可也不可加
貶出遂得罷職出院漢祖南下温叟自洛從至鄭州稱
疾不行及入汴温叟又之方至授駕部郎中周初拜左
諫議大夫逾年改中書舍人加史館脩撰判館事顯德
初遷禮部侍郎知貢舉得進士十六人有諧于帝者帝
怒黜十二人左遷太子詹事温叟實無私後數年其被
黜者相繼登第温叟與張昭同脩漢隱帝及周祖實錄
恭帝卽位遷工部侍郎兼判國子祭酒事宋初改刑部
建隆九年拜御史中丞丁內艱退居西洛旋復本官三
年兼判吏部銓因上言曰伏見兩京百司漸乏舊人多

隳故事雖檢閱具存於往冊而舉行須在於攸司蓋因
年限得官歸司者例與減選冬集赴調授任者尋又出
京兼有裁滿初官不還舊局但稱前資用圖免役又有
嘗因停任切欲歸司而元敕不該無由復職遂使在司
者失於教習歷事者難於追還伏望自今諸司職掌除
官勒留及歸司者如理減外欠三選以下仍須在司執
行公事及三十月卽許赴集如理選外欠三選以上及
在官不成資考者卽准元敕處分若在任停官及在司
停職者經恩後於刑部出給雪牒却勒歸司如無闕員
卽令守闕餘依敕格處分一日晚歸田闕前太祖方與

中黃門數人偶登明德門西闕前騶者潛知之以白溫
叟溫叟令傳呼如常過闕翌日請對具言人主非時登
樓則近制咸望恩宥輦下諸軍亦希賞給臣所以呵導
而過者欲示衆以陛下非時不登樓也太祖善之憲府
舊例月賞公用茶中丞受錢一萬公用不足則以贓罰
物充溫叟惡其名不取任臺丞十二年屢求代太祖難
其人不允開寶四年被疾太祖知其貧就賜器幣數月
卒年六十三溫叟事繼母以孝聞雖盛暑非冠帶不敢
見五代以來言執禮者惟溫叟焉立朝有德望精賞鑒
門生中丞器楊徽之趙隣幾後皆爲名士范杲幼時嘗
以文贄溫叟大加稱獎以女妻之太祖在晉邸聞其清
介遣吏遺錢五百千溫叟受之貯廳西舍中令府吏封
署而去明年重午又送角黍執扇所遣吏卽遣錢者視
西舍封識宛然還以白太宗太宗曰我錢尚不用況他
人乎昔日納之是不欲拒我也今周歲不啓封其苦節
愈見命吏輦歸邸是秋太宗侍宴後苑因論當世名節
士具道溫叟前事太祖再三賞歎雍熙初子炤罷徐州
觀察推官待選以貧詣登聞求法官及引對太宗問誰
氏子炤以溫叟對太宗愀然召宰相語其事且言當今
大臣罕有其比因問炤當得何官宰相言免選以爲厚

恩帝曰其父有清操錄其子登朝庶足示勸擢炤太子
右贊善大夫歷判三司理文憑由司江南轉運司入朝
爲司封郎中炳燁並進士及第

燁字耀卿進士及第積官祕書省著作郎知龍門縣群
盜殺人燁捕得之將械送府恐道亡去皆斬之衆服其
果通判益州召還時王曙治蜀或言其政苛暴真宗問
曙治狀與凌策孰愈燁曰策在蜀歲豐事簡故得以寬
假民比歲小歉盜賊竊發非誅殺不能禁然曙所行亦
未嘗出陛下法外帝善之天禧元年始置監官帝謂宰
相曰諫官御史當識朝廷大體於是以燁爲右正言會

歲荐饑河決滑州大興力役饑殍相望燁請策免宰相
以應天變都城東南有泉出民爭傳可以已疾詔卽其
地建祥原觀燁言其詭妄不經且亢旱不可興土木以
營不急又請罷提點刑獄禁民棄父母事佛老者皆不
報表請補外帝以燁屢言事乃以判三司戶部勾院出
安撫京西還直集賢院同修起居注遷右司諫以尚書
工部員外郎兼侍御史知雜事權判吏部流內銓請京
朝官遭父母憂官司毋得奏留故事當起復者如舊因
詔益梓利夔路長吏仍舊奏裁餘乞免持服者論其罪
改三司戶部副使擢龍圖閣待制提舉諸司庫務權發

遣開封府事累遷刑部郎中龍圖閣直學士知河南府徙河中府卒初王曙坐寇準貶官在朝無敢往見者燁歎曰友朋之義獨不行於今歟往餞之經宿而還嘗善河中處士李漬漬死爲陳其高行詔以著作郎贈之唐末五代亂衣冠舊族多離去鄉里或爵命中絕而世系無所考惟劉氏自十二代祖北齊中書侍郎環雋以下仕者相繼而世牒具存焉子凡

凡字伯壽以燁任爲將作監主簿生而豪雋長折節讀書第進士從范仲淹辟通判邠州邠地鹵民病遠汲凡浚渠引水注城中復興客曰自郭汾陽城此州苟外水

可醜何待今日無爲虛費勞人也凡不荅未幾水果至鑿五池于通達民大便利孫沔薦其才老將帥換如京使知寧州俗喜巫覡校仗妖法結其徒亂有日凡使他兵伏壘門以伺夜半盡禽之加本路兵馬鈐轄知邠州儂智高犯嶺南凡上書願自效以爲廣東西捉殺道聞蔣偕張忠戰沒疾馳至長沙見狄青曰賊若退守巢穴瘴毒方興當班師以俟再舉若恃勝求戰此成擒耳賊果悉衆來大戰于歸仁鋪前鋒孫節死凡以右軍搏鬪自辰至巳勝負未決凡言於青出勁騎五十張左右翼擣其中堅賊駭潰進湟城使知涇州陞見辭以母老丐

復文階歸養仁宗諭承曰涇內地也將世莫便焉命特賜冠帔領恒州御史遷西上閤門使再歸郎中班會公亮薦之復以嘉州團練使爲太原涇原路總管夏人寇用亮堡轉運使陳述古攝涓帥几移文索援兵不聽率諸將偕請又不聽乃趣以手書述古怒移几爲鳳翔且劾生事朝廷以總管非轉運使所得徙置遣御史出按述古黜几亦改鄜州召判三班院邊吏告夏人趨大順英宗問几几曰大順天險非夏人可得近正恐與趨順爲讎爾帝曰明之子奔馬入城幾爲所掩卿料敵一合神也以爲秦鳳總管神宗卽位轉四方館使知保州治狀爲河北第一踰六年卽請老還爲祕書監致仕元豐三年祀明堂大臣言几知音詔詣太常定雅樂几曰古樂備四清聲沿五季亂離廢請增之樂成予一子宮几得謝二十年放曠嵩少間遇唐末異人靖長官者得養生訣故益老不衰間與人語邊事謂張耒曰比見詔書禁邊吏夜飲此曹一旦有急將使輸其肝腦此平日禁其爲樂爲今役者不亦難乎夫椎牛醢酒豐犒而休養之非欲以醉飽爲德所以增士氣也耒敬識其語再加通議大夫卒年八十一几篤於風義推父遺恩官從兄已得任子必先兄弟子之孤者其議樂律最善以爲律

主於人聲不以尺度求合古今異時聲亦隨變猶以古冠服加於今人安得而稱儒者泥古致詳於形名度數間而不知清濁輕重之用故求於器雖合而考於聲則不諧嘗游佛寺聞鐘聲曰聲漸而悲主者且不利是夕主僧死在保州聞魚聲曰宮微而商離至秋守臣憂之及期几遇疾然所學頗雜鄭衛云

劉濤字德潤徐州彭城人後唐天成中舉進士釋褐爲鳳翔掌書記拜右拾遺賜緋時太常丞史在德上章詞理鄙俗仍犯廟諱濤上言請正其罪雖不允時論是之出爲山南東道節度及判官召爲左補闕遷起居舍人晉

天福初改司勳員外郎史館修撰遷工部郎中賜金紫歷度支職方二郎中掌左藏庫時少帝奢侈常以銀易金廣其器皿李崧判三司令上庫金之數及崧以元簿較之少數千鎰崧責曰帑庫通式一曰不受虛數毫釐則有重典濤曰帑司常有報不盡數以備宣索崧令有司劾濤濤事迫以情告樞密使桑維翰乃止罰一月奉漢初宰相蘇禹珪薦爲中書舍人周廣順中坐令子監察御史項代草誥命左遷少府少監分司西京項亦貶復州司戶顯德初就改太常少卿俄拜右諫議大夫四年再知貢舉樞密使王朴嘗薦董子劉譜於濤濤不納

朴銜之時世宗南征在迎鑾濤引新及第人赴行在朴時留守上都飛章言濤取士不精世宗命翰林學士李昉覆試出者七人濤坐責授太子右贊善大夫恭帝卽位遷右詹事濤性剛毅不撓素與宰相范質不協常鬱鬱不得志遂退居洛陽之清化里杜門以書史自娛太祖素知濤履行開寶二年召赴闕以老病求退授祕書監致仕年七十二卒清泰初中書舍人盧遵受詔主文將鎖宿濤力薦薛居正以爲文章器業必至台輔導取之後果爲相世稱其知人頊子歲晟子訥譚並進士及第至屯田員外郎訥爲殿中侍御史

邊光範字子儀并州陽曲人性謙退和雅有吏材父仁嗣忠武軍節度副使光範後唐天成二年起家榆次命召爲殿中丞賜緋長興四年改太常丞丁內艱晉天福初服闋授檢校戶部員外郎北京留守判官兼侍御史二年拜太府少卿上書曰臣聞唐太宗有言朕居深宮之中視聽不能及遠所委者惟都督刺史則知此官實繫治亂必須得人今則刺史或因緣世祿或貢奉家財或微立軍功或但循官序寔恐撫民無術御史無方以此牧民而民受其賜鮮矣望選能吏以蘇民瘼用致升平奏入留中不出俄爲冊秦王李從躡副使張從恩以

外戚爲河南尹奏授判官遷祕書監兼御史中丞入拜
大理少卿少帝尹京改衛尉少卿充開封府判官又改
光祿少卿廣晉府判官賜金紫少帝卽位拜右諫議大
夫權知開封府事遷給事中會蝗災遣使亳州括借軍
糧稱爲平允時與契丹失歡河朔連兵命光範出使脩
好會契丹復南入光範行至趙州召還開運元年權知
鄭州拜左散騎常侍二年入爲樞密直學士少帝以光
範藩邸舊僚待遇尤厚因游宴見光範位翰林學士下
卽日拜尚書禮部侍郎知制誥充翰林學士仍直樞密
院漢初改檢校刑部尚書衛尉卿上言伏見朝廷除刺
史不限年月或未及期年又聞除代往來跋涉豈暇撫
懷望慎選良牧立定年限以責輯綏之効疏入不報乾
祐二年遣使宋州虞城汝州襄城按視民田之傷稼者
是冬爲吳越加恩使周廣順初出知陳州遷祕書監俄
召拜御史中丞賜襲衣銀器繒絲鞍勒馬復爲禮部侍
郎時禮部侍郎於貢部或掌或否光範拜官將及秋試
乃言於執政曰單門偶進何言名第若他曹公事光範
不敢辭若處文衡校閱名賢品藻優劣非下走所能執
政曰公晉未爲翰林樞密直學士勿避事也及期光範
辭疾不出乃以翰林學士承旨徐台符掌之時論多其

自知世宗卽位改刑部侍郎權知開封府俄遷戶部顯
德三年命往大名檢民田五年遣使普均租稅光範詣
宋州時韓通掌禁兵領宋師修汴堤訪郡民皆言光範
均平之狀乃具以聞世宗嘉之宋初征澤潞命光範爲
前軍轉運計度鄭洛汝孟懷芻糧秋拜太常卿時張昭
爲吏部尚書朝議以其耆老令光範簽判選事建隆四
年襄州節度慕容延釗征湖南以光範權知州事路當
衝會餉饋無闕是冬郊祀召還會延釗卒復知襄州大
軍數萬由陝路討蜀出漢土光範復當供億人不知勞
嘗舉本鎮判官李穡爲殿中侍御史穡後坐事除籍光
範左遷太子賓客仍知襄州五年兼橋道使朝廷遣使
督治道常六七輩一使所調發民皆數百人吏緣爲姦
多私取民課所發不克數而道益不修光範計其工以
州卒代民官給器用役不淹久人以無擾詔書褒美開
寶四年復判吏部銓曹御史中丞劉溫叟卒以光範判
御史臺事數月真拜中丞六年以疾解銓曹任卒年七
十三光範性至孝謙退和易雅有吏幹母病疽光範嘗
吮之景德中錄其孫易從同學究出身

劉載字德輿涿州范陽人唐盧龍節度濟之六世宗
父昭下蔡令載後唐清泰中舉進士晉初解褐校書

郎遷著作佐郎賜緋拜左拾遺集賢殿直學士漢初
爲殿中侍御史丁內艱服闋復拜舊宮判西京留臺
改倉部員外郎嘗著五論曰爲君爲相爲將去讒納
諫頗爲文士所稱周世宗初擢知制誥顯德三年拜
右諫議大夫與右拾遺鄭起尚書博士李寧同校道
書遷給事中使許州定田租俄賜金紫爲魏王符彥
卿加恩國信使宋初浚五丈河自陳橋達曹州之西
境命護其役建隆四年貝州節度使張光翰來朝遣
載權知州事光翰歸鎮載還知貢舉乾德初掌建安
權貨務六年就爲江西南國主生辰使召還令知鎮州

開寶四年坐與何繼筠不協改山南東道行軍司馬十
年不召嘗受詔權點檢州事太平興國初復入爲給事
中三年出知襄州六年代還告老改工部侍郎致仕乃
賜一子出身八年卒年七十一載尤好學博通史傳善
屬文嘗受詔撰明憲皇后謚冊文又作弔戰國賦萬餘
言行於世雅信釋典敦尚名節子宗言至此部郎中宗
望景德二年進士及第大中祥符四年其孫介以載文
集來獻以爲試將作主簿

程羽字冲遠深州陸澤人少好學能屬文晉天福中擢
進士第授陽穀主簿歷虞鄉醴泉新都令皆有政績開

寶中選爲兩使判官入對太祖詢以時事敷奏稱旨擢
著作郎出知興州踰年改知興元府

闕

八年詔

歸闕以本官領開封府判官羽性淳厚蒞事恪謹時太
宗尹京頗以長者待之及卽位拜給事中知開封府未
幾出知成都府爲政寬簡蜀人便之入朝拜禮部侍郎
上欲優以清職故事端明殿設學士二員居翰林學士
上專備顧問馮道趙鳳始居是職累朝因之及是卽殿
名以羽爲文明殿學士位在樞密副使下且卽秦寧坊
營第以賜之太平興國五年典試貢士御試得人居多
六年以老疾求解職拜兵部侍郎未幾致仕仍給全奉
雍熙元年卒年七十二贈禮部尚書子帝振以蔭至尚
書虞部員外郎大中祥符元年卒其子適賜同學究出
身從孫琳別傳

論曰五季爲國不四三傳輒易姓其臣子視事君猶傭
者焉主易則他役習以爲常故唐方滅卽北面于晉漢
甫稱禪已相率下拜于周矣君子傷之此雜臣傳所繇
立也李穀邊歸謹竇貞固李濤輩或在廟堂或侍帷幄
世主之所寵任社稷之所倚賴而更事異姓不能以名
節生死倫義廢矣且穀以籌策自名乃不能料藝祖有
容人之量及受李筠餽遺懼其見殺遂以憂死又何

邪嗚呼魏范粲齊顏見遠宜見褒於前史也

宋史卷二百六十二

死傳

三十三

[Faint vertical text columns, likely bleed-through or ghosting from the reverse side of the page. The characters are difficult to read due to fading.]

宋史卷二百六十二終

